

Hibru Kimbi

Kunöŋ Hibru yeŋgöra Kimbi alök.

Jim-asa-asari

Jisösnöŋ Suepnöŋ öŋgöi miangö andöŋe yambu 35 miangö dop teköiga azi kun qetŋi qahö mötzini, yaŋön Kimbi ki ohoba Juda urumelen ambazip yeŋgöreŋ alök. Juda yeŋön Hibru (kian) keu jigerangöra qetŋini Hibru qetket. Tosatŋan Juda urumelen ambazip mi sesewerowero gwötpuk ak enjigetka Jisösgö köna diŋdiŋi mosötpingö mötmöriba Juda yeŋgö köna walŋe dumŋe kunbuk aŋgotpingö mötket. Köna walŋi mi Köna keugö kapankölköl.

Kimbi kiangö keu kötŋi 3 mi kewö:

1. Jisös, Anutugö Nahönŋi yaŋön sihimbölo ketanŋi möta mewö mianŋön Iwiŋi tem kölmamgö könaŋi mörök. Miangöra Suep garata, Moses aka kezapqetok ambazip pakpak enjogŋita öŋgöŋgöŋi akza.

2. Anutunöŋ Jisös kuŋguiga nalö teteköŋi qahö jike nup galömnini bohonŋi aka malma. Nanŋi sepŋi mokoyöhanğöra jöwöwöl ohohonöŋ teköiga jike nup galöm tosatŋi yeŋgöra qahö osibin.

3. Urumelen neŋön Jisös möt nariinga siŋgisöndoknini mosöta amöt qem neŋgiba kömupnöhök meköm neŋgiiga keŋgötnini qahö mötzin. Jike nup walŋi mi imutimut ewö aiga megetka Jisösnöŋ amötqeqegö könaŋi ölni indela nanŋi jöwöwöl ohoho ewö akŋegöra al aŋguyök.

Mötnarip ambazip ketani yengö silikɲinanɲö kösohotɲi mi teteköŋe (Boɲ 11) ohoba mötnaripɲinan söröraubapuköra kewö kuɲgum eɲgiza, “Sesewerowero ak eɲgigetka miangö sihimbölonɲi mi mönö kapan köla mökösoɲda möta Jisösbuk luhut alme.” Buk kiangö qambaɲi aka galöm meme keuɲi mi nahömɲambuk.

Buk kiangö bahöɲi bohonɲi 10 mi kewö:

Keu mutukɲi: Kraistnöɲ Anutugö könaɲi indel teköyök 1.1-3

Kraistnöɲ garata pakpak eɲgoɲgitza 1.4-2.18

Kraistnöɲ Moses aka Josua etkoɲgitza 3.1-4.13

Kraistnöɲ jike nup galöm pakpak eɲgoɲgitza 4.14-7.28

Kraistkö jöhöjöhö areɲi mi jöhöjöhö areɲ walɲi oɲgitza 8.1-9.28

Kraistkö sep busuɲan jöwöwöl pakpak eɲgoɲgitza 10.1-39

Mötnarip mi yuai mutukɲi aka bohonɲi 11.1-12.29

Ahakmemeninan Anutu uru ölöwak mem wanɲime 13.1-19

Köuluk teteköɲi 13.20-21

Uruwahöt keu aka yaizökzök keu teteköɲi 13.22-25

Anutunöɲ Nahönɲi melaiiga keuɲi indelök.

¹ Anutunöɲ mönö möpɲangö möpɲeyök könahiba köna murutɲi murutɲi wuatangöba keuɲi indel-mangö mörök. Mewö möta keuɲi nalö gwötpuk kezapqetok ambazip yengö uruɲine aliga aukɲe jigetka amböskonurupɲinan möta mala kotket.

² Mewö mala kotketmö, nalö teteköñe malinga kewöñe mönö Nahönñi melaiiga keuñi indela aukñe jiiga mörin. Nahönñi yañön Iwiñi bauköiga Suep gölme aka mietkö öröyuaiñiri pakpak mi-wikñaiyo-hotka Nahönñan nalö teteköñe yuai pak-pakö Tonji akñapakö jim teköi malja.

³ Anutugö kaisongolomñan Nahönñi ahöm wañgiiga eta kondelök. Anutugö asakmararañan mönö i kuñguiga biliksik aliga imutimut ewö ehin. Singisöndoknini köl könjörat teköbagun mönö Suep mire öngöba dumñi memba Öngöñgöñamninañgö böröñi öñe tatza. Mianğöreñ tata Suep gölmegö öröyuai pakpak mi keuñi kukösumñambukñöñ bisiba galöm köla malja.

Anutugö Nahönñan Suep garata engongitza.

⁴ Anutunöñ Nahönñi qet wañgiiga mianñön mönö Suep garata yengö qetñini onğita aködamunñambuk akzawi, mianğö dop Nahönñan Suep garata engongita ketanamñini aiga nembö bapñe malje.

⁵ *Anutunöñ nalö kunöñ Suep garataurupñi yengöreñök kungöra keu kewö qahö jiyök, “Gönön nöñgö Nahöni aknöñga nönön merak göhö Iwigi akzal.”

Mewöyök keu kun kewö jii ahöza, “Nönön yañgö Iwiñi akiga yañön nöñgö Nahöni akña.”

⁶ *Keu mi dumñe kunbuk Nahönñi mutukñi jim teköiga gölmenöñ etmamğö ahöhi, nalö mianğöreñ mönö qeljiñe kewö jiyök, “O Suep garataurupni, iñini mönö körek pakpak yañgö waikñi memba möpöseiba malme.”

* **1:5:** Sum 2.7; 2 Sml 7.14; 1 Hist 17.13 * **1:6:** Dut 32.43

7 *Suep garata yengöra keu kewö jii ahöza, “Anutunön mönö garataurupni mem letot enjiiga luhut ewö aka anda kame. Welenqeueurupnan mönö letota könöp bölam ewö aka anda kame.”

8 *Yengöra mewö jiyökmö, Nahönnaᅅgöra keu kun kewö jii ahöza, “O Kembu, göᅅön mönö jakömbuak dum tatatke nalö teteköᅅi qahö tat öᅅgöman. Öörpki kukösum-ᅅambuk mianᅅön qindinaim neᅅginöᅅga ahakmeme diᅅdiᅅan mönö bemtohoᅅgahö muᅅgemᅅi aka ahöm öᅅgöma.

9 Göᅅön ahakmeme solannaᅅgöra ak ghiiga ahakmeme goᅅgoᅅnaᅅgöra irimᅅi seholiiga kazik aka mala kotnöᅅ. Mianᅅöra göhö bemᅅi Anutu yaᅅön mönö al ghiiga alaurupki enᅅoᅅgita sösoᅅgai kelöknöᅅ gömirii maljan.”

10 *Nahönnaᅅgö keuᅅi kun mi kewö, “O Kembu, göᅅön könakönahiᅅe gölmegö tandöᅅi kuᅅgunöᅅga Suepkö jakenᅅi jakenᅅi mienᅅön mönö göhö börösöwöᅅi akze.

11 Suep gölme pakpak mienᅅön opo maluku ewö walᅅi aka ayapkömemö, göᅅön mönö köhöiba kin öᅅgöman.

12 Möki köpeimakzini, göᅅön mönö mianᅅö dop suep ehekᅅi mi opo söro jöhözin ewö köpeim enᅅinöᅅga letotme. Yuai pakpak utekömapmö, göᅅön mönö tandök mohot miyök aka yambugi (yaragi) teteköᅅi qahö mal öᅅgöman.”

13 *Anutunön nalö kunöᅅ Suep garataurupni yengöreᅅök kungöra keu kewö qahö jiyök, “Göᅅön

* 1:7: Sum 104.4 * 1:8: Sum 45.6-7 * 1:10: Sum 102.25-27

* 1:13: Sum 110.1

mönö kaba böröni ölje tatnönga nöñön mönö tuarenjonurupki nalö sutñi kianğöreñ tim tötal enğibiga et enğuiga göhö könagahö döpnji aketka köirañ albin.”

¹⁴ Nahönñanğöra keuñi keuñi mewö jiyökmö, Suep garata i mönö ninja akze? Körek yeñön Anutugö welenqege unaurupñi akze. Mewö aka ambazip oyaenköyaen buña qem anğumei, i bauköm enğimegöra melaim enğii malje. Mewö.

2

Urunini qahö melenbinbukö galöm meme keu

¹ Mianğöra Buña keu mörini, mi mönö törörök möt asaribingö kapan köla kezap alme. Gölmenöñ malmalgö inji me waiñi kunñan nenğuanğiri lañ anda kaba liklak malbin ewö, mönö Jisösgö amötqege nupñi onğita öne mala ayuhubinbuk.

² Keu mi kewö jim tuarimam: Mutuk Suep garata yeñön Buña keu jigetka ambazip jöhöm enğii malget. Mewö mala denike yeñön Köna keu qahö tem köla selñi walönğeri, Anutunöñ mönö körek yeñgö keuñini diñdiñanök jim teköba likepñi melen enğii lömböt qakñine öngöi mala kotket.

³ Yeñön lömböt miwikñaigetka neñön mewöñanök akzin ewö, lömbötköra mönö denöwö ölöñ kölbinak? Amötqege nup ketañi mi nesampurek qakñe nönönğan akin ewö, mönö lömbötnöhök ölöñ kölbingö osibin. Kembunöñ könahiba amötqeqegö könani indeliga tosatñan keu mi jitñeyök möta nanğöba jim köhöigetka sehiba dop köl nenğiyök.

⁴ Mi naŋgöba jim köhöigetka Anutunöŋ yembuk mohotŋe kinda keuŋini naŋgöba jiiga aŋgöletot aiwesök könaŋi könaŋi mi kukösumŋinambuk asuhugetka Uŋa Töröŋi mokoba jitsihitŋaŋgö dop mendeŋniga dop köl neŋgiyök. Mewö.

Jisösnöŋ datnini aka Suepnöŋ neŋguaŋgitmamgö mötza.

⁵ Suep gölme dölökŋi asuhumegö keuŋi jimakzini, Anutunöŋ nini miangöreŋ Suep garata nembö bapŋine malbingö areŋi qahö ala jim kutuyök.

⁶* Mewö qahöpmö, keu mi kunŋan naŋgöba jiiga Buŋa Kimbigö kemaŋi kunöŋ kewö ahöza, “Gölme azinöŋ mönö niŋia aiga i mötmörim waŋgimakzan? Suep gölmegö azi ölnan mönö niŋia aiga i köyan kölakzan?”

⁷ Göŋön i memba et al waŋginöŋga nalö töröpŋi Suep garata yeŋgö nembö bapŋine eta eretŋi aka malök. Mali waŋgitnöŋga asakmararaŋnöŋ öŋgöiga kösatorom ila jalö waŋginöŋga aködamunŋambuk aka qetbuŋaŋambuk malja. Mewö mala öroyuai pakpak galöm köla malja.

⁸ Börösöwögi pakpak mönö yaŋgö jimkutuku-tuŋaŋgö bapŋe malmegöra memba et al enŋinöŋga malme.”

Keu miangö dop yuai pakpak mi yaŋgö kukösum bapŋe malmegöra memba et al enŋiba miangöreŋ yuai kun qahö mosöriŋa yaŋgö keuŋaŋgö bapŋe qahö ahöbawak. Areŋ mewö alökmö, nalö kewöŋe börösöwöŋi pakpak mi yaŋgö kukösum bapŋe

* 2:6: Sum 8.4-6

memba et al engii tem kölakzeangö dop qahö engehakzin.

⁹ Mewö qahö engehakzinmö, Jisösnöñ mönö kewö letota mali ehakzin: Kömupkö sihimbölöñi möröhangöra Anutunöñ wangiri asakmararanöñ öngöiga kösatorom ila jalö wanggiiga ehinga aködamunñambuk aka qetbuñambuk malja. Anutunöñ kalem möriamñi kondel neñgimangö möta körek neñgöra aka kömupkö sihimbölöñi mötmapkö jim teköyök. Miangöra memba et al wanggiiga nalö töröpñi Suep garata yengö nembö bapñine eta eretñi aka malök. Mewö malökmö, nalö kewöñe qetbuña öngöngöñi memba malja.

¹⁰ Anutunöñ mönö öröyuai pakpakö könani akza. Yanñön körek nini nanñi möpöseim wangibingöra aka miwikñaim neñgiiga maljin. Yanñön ambazip sehisehñi neñguanñiri asakmararanöñ öngöbingöra mötza. Mewö möta amötqeqeninangö Tonji mi qahö angön köliga sihimbölö möta mewö mianñön nupñi mi mem teköi asakmararanñi pakpak miwikñaimapakö möri dop kölök.

¹¹ Kunöñ mem sarahim neñgimakzawi aka ambazip sarakñi ahakzini, körek neñgö kondotkondot Toninan mönö mohot akza. Miangöra Jisösnöñ qetnini “Alaurupni,” mewö qetmamgö gamuñi qahö mötza.

¹² *Könaninangöra Buña keu kun kewö jii ahöza, “Nöñön mönö göhö qetki mi nani alaurupni yengöra qet asarim engiba urumelen könagesö sutñine kinda möpöseim gihimakñam.”

* **2:12:** Sum 22.22

13 *Mewöyök miangö Buña keñji kun kewö jii ahöza, “Nöñön mönö mötnaripni Anutugöreñ ala malmam.” Dumñe kunbuk miangö Buña keñji kun mi kewö jii ahöza, “Mötnöñ, ni aka Anutunöñ nahönbörat niñgiyöhi, neñön mönö ki maljin.”

14 Kunöñ mem kömum neñgimangö kukñi memba maljawi, Jisösnöñ mönö i tulumgöi gemapköra aka kömumba miangön luhut alök. “Bölöñangö Tonji tulumgömam,” jiba ambazip sep busuni-nambuk maljini, miangöra yañön mönö mewöyök nembuk tandök mohot miyöhök gölme azia ahök.

15 Ambazip malmalñini gölmenöñ maljeangö dop kömumbingö keñgötñinan jöhöm enñii mala kotkeri, mi mönö körek pösat enñii solanimegöra aka gölme azia ahök.

16 Suep garata köyan köl enñgimapköra gölme azia qahö ahökmö, Abrahamgö gwölönarökurupñi nini möt anñön köla bauköm neñgimakñapköra mönö mewö ahök.

17 Könañi miangöra aka yañön öröyuai pak-pak miangöreñ alaurupñi nembuk tandök mohot miyöhök ahök. Jike nup galömnini bohonñi aka nupñi nömtik memba ak kömum neñgiba malmapköra mönö nembuk tandök mohot ahök. Tandök mohot akagun mönö ölop jitñememenini aka jike galöm bohonñangö nupñi memakza. Mi memangöra siñgisöndokninangö töwanji ala Anutugö jeñe mi köl köñjörarök.

18 Gölme azia aiga esapköm wanñigetka nanñak sihimbölo möta malöhi, miangöra ambazip

* 2:13: Ais 8.17, 18

esapköm neŋgimakzei, nini mönö ölop bauköm neŋgimakŋa. Mewö.

3

Jisösnöŋ Moses oŋgita öŋgöŋgöŋi akza.

¹ Miangöra urumelen alaurupnini sarakŋi, Suep Toŋan eŋgoholi nembuk kambu mohot maljei, eŋön mönö urumötmötŋini pöndaŋ Jisösgöreŋ ala malme. Anutunöŋ i melaiiga aposol aka jike nup galömnini bohonŋi akzawi, yaŋgöra mewö jim miwikŋaimakzin.

² *Mosesnöŋ Anutugö könagesöŋi pakpak mi memburikŋi qahöpmö, pöndaŋ galöm köl eŋgiba malök. Miangö dop Jisösnöŋ mewöyök kun kungum waŋgiyöhi, yaŋgö keuŋi (misila) törörök wuatangöba memburikŋi qahöpmö, pöndaŋ nömtik memba malök.

³ Miri aka azi miri meyöhi, mi kewöt etkiinga mitimqege azigö qetbuŋaŋan mönö mirigö qetbuŋaŋi gwötpuk oŋgitza. Miangö dop Moses aka Jisös kewöt etkiinga Jisösgö asakmararaŋi öŋgöŋgöŋan mönö Moses gwötpuk oŋgitza. Könaŋi mewö eka miwikŋaimakzin.

⁴ Miri pakpak mi kungö börösöwöya akzemö, yuai pakpak mi mönö Anutugö börösöwöŋi akza.

⁵ Mosesnöŋ Anutugö könagesöŋi pakpak mi memburikŋi qahöpmö, pöndaŋ welen qem eŋgiba malök. Mewö mala Anutunöŋ könaŋgep azi kungöra jiyöhi, mönö keu miangö söpsöpŋi mi qeljine indela dangunuŋa kinök.

* 3:2: Jaŋ 12.7

6 Mewö kinökmö, Kraistnöŋ mönö Anutugö Nahönŋi aka Iwiŋaŋgö keuŋi (misila) nömtik memba könagesöŋi pöndaŋ galöm köl neŋgiba malja. Anutugö könagesöŋi mi neŋön akzin. Oyaenŋkoyaen akingö jörömqöröm aka miangören qekötahöba silenini memba öŋgöba awösamkakak kin köhöim teköbin ewö, mönö Anutugö urumelen könagesöŋi aka malbin. Mewö.

Yaŋgiseŋ aka malbinbukö galöm meme keu

7 *Miangöra inŋini mönö Uŋa Töröŋan keu kewö jimakzawaŋgö dop akŋe, “Dölkewöŋe Anutunöŋ enŋohola keuŋi saŋep ali mötze ewö,

8 uruŋini mönö mötmöt bölöŋan kude gwözöŋme. Enŋö ambösakonurupŋinan gölme qararaŋkölkölŋe kaba nalö kunöŋ Anutu qetala esapköm waŋgiba karim akeri, inŋini mönö miangö dop Anutu qetala akepuk.

9 Yeŋön gölme qararaŋkölkölŋe kaba Anutu ni esapköm niŋgiba malget. Anŋöletot aka memba malali, inŋini mi yambu (yara) 40 miangö dop eka mala mi töndup ni qahö möt narim niŋgigetka urunan böliiga malal.

10 Miangöra ambazip kambu nalö miangören gölmenöŋ malgeri, yeŋöra aka irimni seholiiga kewö jial, ‘Yeŋön mönö sundan uruŋinan kahapmahap aka janjuŋ anakze. Malmalgö köna kusum enŋgiba malalmö, mi qahö möt kutuget. Qahö!’

11 Mewö jiba irimsesewöl qakŋe keuni jim kutuba jöjöpaŋ keunan mi jöhöba kewö jial, ‘Luhut memba malmegö areŋ al enŋgialmö,

* 3:7: Sum 95.7-11

yeñön mönö oyaenköyaen mianğören qahö anğotme.’ ”

12 O urumelen alaurupni, injini mönö kewögöra galöm mem anğuba malme: Engörenök kungö uruñan gonğiiga mötnaripñan sörauba eri Anutu malmal Toni andö qeba malbapuk.

13 Mewö qahöpmö, siñgisöndokö isimkakalekñan tilipköm engii mianñon engörenök kungö uruñi gwözönbapuköra mönö silim dop sutñine uru kuñgum anğuba malme. “Merak” keu mi jimakzini, mianğö dop mönö jölöngöm anğuba malme.

14 Nini Kraist möt anğon köla yambuk kambu mohot aka maljin. Mutuk urunini melenđa uruyahöt yaköriba awösamkakak miwikñaiba malini, mewö gölmenön malbinanğö dop kapañ köla köhöiba kinbin ewö, mönö oyaenköyaen akin.

15 *Buña keu mi kunbuk jiba kewö ohozal, “Merak Anutunön engohola keuñi sañep ali mötze ewö, uruñini mönö kude gwözönme. Engö ambösakonurupñinan Anutu qetala karim akeri, injini mönö Anutu mianğö dop qetala akepuk.”

16* Ambazip denike yeñön Buña keu möta Anutu qetala karim aket? Mosesnön könagesö enğuanğiri Ijpt mosöta kageri, yeñön mönö körek mewö aket.

17 Ambazip denike yeñgöra aka yambu (yara) 40 mianğö dop irimñi seholiiga kazik ak engii malget? Ambazip siñgisöndok aketka mem kömum engii sileninan gölme qararanğölkölñe eta kölgeri, yeñgören mönö mewö asuhuyök.

18 Luainön luhut memba malmegö areñ ala nanñini gölmenine kude anğotmegö keuñi jim ku-

* 3:15: Sum 95.7-8 * 3:16: Jan 14.1-35

tuba jöjöpaŋ keuŋan jöhöyöhi, keu mi mönö dagöra jiyök? Ambazip keuŋi qetala yaŋgiseŋ malgeri, mi mönö yeŋgöra aka jiyök.

¹⁹ Keu mianğö könaŋi mi kewö ek asarizin: Yeŋön Anutu qahö möt nariba yaŋgiseŋ akeranğöra aka nanŋini gölmeŋine aŋgotpingö osiget. Mewö.

4

Anutunöŋ könağesöŋi sonda kendon neŋgima.

¹ Anutugöreŋ aŋgota luainöŋ luhut memba malbingö keu jöhöyöhi, keu mianğön mönö pöwöwöm köhöikŋi ahöm neŋgiza. Mianğöra eŋgöreŋök kunŋan löwöriba nanŋi Suep köna ananŋi mi kemaŋe kutui mewö miwikŋaim waŋgibinbuk. Mianğöra mönö sutnine galöm mem aŋgubin.

² Gölme qararaŋkölkölŋe kagetka Ölöwak Buŋa jim asarim neŋgiget ewö jiget mötketmö, keu mi mönö silesile mötketka uruŋine qahö geyök. Mianğöra mötnariŋŋini qahö qiwikŋaiiga tönpin öne malgetka qahö bauköm eŋgiba pömsöm qeyök.

³ *Urunini melenđa möt nariba maljini, neŋön mönö Anutugöreŋ aŋgota luhut memba oyaenköyaen malbin, mi mötzin. Anutunöŋ mianğö Buŋa keuŋi mi kewö jii ahöza, “Mewö jiba irimesewöl qakŋe keuni jim kutuba jöjöpaŋ keunan mi jöhöba kewö jial, ‘Luhut memba malmegö areŋ al eŋgialmö, yeŋön mönö oyaenköyaen mianğöreŋ qahö aŋgotme.’”

* **4:3:** Sum 95.11

Anutunöŋ Suep gölme miwikŋaim etkii nalö mianğöreŋök kōnahiba oyaenŋkoyaen miriŋan lōk memtekōtekōŋi ahōzapmō, tōndup keu mewō jiyök.

⁴*Anutunöŋ silim 7:ŋaŋgō keuŋi jiiga Buŋa Kimbigō kemaŋi kunöŋ kewō ahōza, “Sōmaŋi 7 aiga Anutunöŋ nupŋi pakpak mem teköyōhaŋgō luhut memba kendon tarök.”

⁵*Anutunöŋ Buŋa keu mi toroqeba kewō jii ahōza, “Luhut memba malmegō areŋ al enġialmō, yeŋön mönō oyaenŋkoyaen mianğöreŋ qahō aŋgotme.”

⁶Ambazip tosaŋŋan Anutugō oyaenŋkoyaen miwikŋaiba luhut memba malmei, keu mianğön mönō pōwōwōm kōhöikŋi ahōm neŋgiza. Ölöwak Buŋa mutuk kōnagesō jim asarim enġigeri, yeŋön mönō qeŋqetalŋinaŋgōra aka oyaenŋkoyaenŋöŋ qahō aŋgota luhut qahō meget.

⁷*Luhut qahō megeraŋgōra aka Anutunöŋ mönō kunbuk nalö kun ala qetŋi Nalö dōlkewōŋi qerök. Nalö köröpŋi tekōiga nalö mianğō Buŋa keuŋi dōlki jiba ohozali, mi mönō Deiwidköreŋ indeli kewō jiyök, “Dōlkewōŋe Anutunöŋ enġohola keuŋi saŋep ali mötze ewō, uruŋini mönō kude gwözōŋme.”

⁸*Mewō jiiga Josuanöŋ enġuaŋgiri oyaenŋkoyaenŋöŋ aŋgota luhut membeak ewō, Anutunöŋ mönō nalö kungō keuŋi mi kōnaŋep qahō jibawak.

⁹Mi qahō jibawakmō, Anutunöŋ mönō öŋa kōnagesō luhut meme neŋgii oyaenŋkoyaen miwikŋaibin. Keu mianğön mönō pōwōwōm kōhöikŋi

* 4:4: Jen 2.2 * 4:5: Sum 95.11 * 4:7: Sum 95.7-8 * 4:8: Dut 31.7; Jos 22.4

ahöm nenḡiza.

¹⁰* Mianḡö kōnaḡi kewō: Anutunōḡ nannḡi nupḡi meyoḡanḡö luhut memba kendon tarōhi, mianḡö dop kunōḡ Anutugō oyaenḡkoyaenḡnōḡ anḡota luhut memawi, yaḡōn mönō nannḡi nupḡi meyoḡanḡö luhutḡi mi mewōḡanök memba oyaenḡkoyaenḡ malma.

¹¹ Mianḡöra nini mönō Anutugō oyaenḡkoyaenḡnōḡ anḡota luhut memenḡi miwikḡaibingō kapaḡ kolbin. Enḡōrenḡök kunōḡ et qeba kōnagesō walḡi yēḡö qeḡetal tandōḡḡini miyōḡök wuatangōbapukōra mönō kapaḡ kolbin.

¹² Anutugō keunḡi mi memguliguligō kōnaḡi aka kukōsum-ḡambuk akza. Bingō sou ketanḡi mi likeḡ likeḡ jitḡirambuk akzapmō, Anutu keunḡanḡö jitḡan mönō sou ketanḡi pakpak enḡonḡita jit kötök aiga jitḡi bahōbahō mi mauḡambuk akzahot. Keu mianḡōn mönō uru uḡanini kutuba ömenōḡ me Anutugō Uḡanḡan inahöm nenḡimakzawi, mi undenḡa kungum nenḡimakza. Sile kitip toroḡeḡenini aka sihitninanḡö digonḡi mi mewōyök kewōta (keunini asa-asambōḡḡi miwikḡaiba) ölopḡi aka bölōḡi mendenḡ etkimakza. Urukōnōmnini aka mötkutukutu arenḡnini mi kewōta keunini jim tekōmakza.

¹³ Anutunōḡ yuai pakpak miwikḡaii ahōzawi, mianḡōrenḡök yuai kun mi asa-asambōḡḡe qahō ahōiga ölopḡanök ehakza. Yuai kun esuhuinga Anutunōḡ esunini mi ölop lulunḡa ehi yanḡö jemesoholḡe aukḡeyök ahōza. Ahakmemeninanḡö kösohot pakpak mi mönō yanḡöra jim asaribinanḡö dop akzin. Mewō.

* 4:10: Jen 2.2

Jisösnöŋ jike nup galömnini öŋgöŋgöŋi akza.

¹⁴ Jisösnöŋ jike nup galöm bohonŋi öŋgöŋgöŋi ak neŋgiza-waŋgöra aka neŋön “Möt narim waŋgizin,” jiba jim miwik-ŋaimakzini, miangöreŋ mönö köhöiba kinbin. Jisös Anutugö Nahönŋan mönö Suep jakeŋi jakeŋi eŋgoŋgita öŋgöba tatza.

¹⁵ Urumötmötnini tosatŋan lölöwöröŋi aketka jike nup galöm tosatŋan miangöra wösömötmöt qahö ak neŋgimakzemö, nanine jike nup galömninan mönö qainŋi kun kewö akza: Yaŋön mönö nini ewö ahakmeme pakpak miangöreŋ nembuk tandök mohot esapköm waŋgiba malgetmö, mi töndup siŋgisöndok kun qahö ahök.

¹⁶ Jike galömninan mönö eu kalem möriamgö dum tatatŋe tata ak kömum neŋgimamgö mörakza. Miangöra mönö awösamkakak qakŋe kinda yaŋgö kösutŋe anbin. Yaŋgö kösutŋe aninga kalem möriamgöra osizini, miangö nalö diŋdiŋe mönö bauköm neŋgiiga mi ölöp miwikŋaibin. Mewö.

5

Galöm bohonini Jisösnöŋ mönö bauköm neŋgimakza.

¹ Gölmegö jike nup galöm bohonŋi pakpak mi ambazip sutŋineyök möwölöhöm eŋgiba nup kewö memegöra kuŋgum eŋgimakzin: Yaŋön ambazip jitrjememenini aka Anutubuk urumohot aka malbingö nupŋi memba siŋgisöndok ahinangö sömbup kalemŋi kalemŋi mi Anutugöra ala mianön jöwöwöl ohomakza.

² Nanŋi urumöt-mötni tosatŋan mewöyök lölöwöröŋi akza. Miangöra ambazip gukmaulem

qakne janjun ahakzei, mi ölop wösömötmöt qakne ak neŋgimakza.

³ *Lölöwöröŋi akza-waŋgöra mönö nanŋi siŋgisön-dokŋi aka könagesöurupŋi yengö siŋgisöndokŋini mewöyök köl könjöratmapköra sömbupnöŋ jöwöwöl ohomakza.

⁴ *Kunŋan qetbuŋa mi nanŋaŋgöra qahö buŋa qem aŋgumapmö, Anutu-nöŋ Aron oholöhi, miangö dop mönö i mewöyök oholja.

⁵ *Miangö dop Kraistnöŋ mewöyök nanŋak jike nup galöm bohonŋi akŋapkö qetbuŋaŋi mi nanŋaŋgöra qahö buŋa qem aŋguyökmö, Anutunöŋ kewö jim kutum waŋgiyök, “Göŋön nöŋgö Nahöni aknöŋga nöŋön mönö merak göhö Iwigi akzal.” Keu miangö dop jike nup galöm bohonini ahök.

⁶ *Keu miyöhök jii Buŋa Kimbigö kemaŋi kunöŋ kewö ahöza, “Göŋön mönö Melkizedek ewö jike nup galöm aka nalö teteköŋi qahö mal öŋgöman.”

⁷ *Jisösnöŋ silebuk gölmenöŋ mala miangören mönö nalöŋi nalöŋi köuluköba köhöikŋanök qeriga imbilŋan eri Anutu kömupnöhök mekömapkö köhöiyöhi, i qesim waŋgiba malök. Qesim waŋgiba mala Anutu göda qeba keuŋaŋgö bapŋe al aŋguba malöhaŋgöra Anutunöŋ köulukŋi mörök.

⁸ Nahönŋi ahökmö, Anutunöŋ mi töndup si-himbölö qahö jöhöi qakne öŋgöi möta miangören temkölkölgö könaŋi miwikŋaiba möt soroköyök.

⁹ Mi möta aködamunŋi pakpak miwikŋaibagun mönö oyaenköyaen teteköŋi qahö malbingö kon-

* 5:3: Lew 9.7 * 5:4: Eks 28.1 * 5:5: Sum 2.7 * 5:6: Sum 110.4 * 5:7: Mat 26.36-46; Mak 14.32-42; Luk 22.39-46

dotkondot Toņi ahök. Mianğöra ambazip yaņğö jitņi tem köla maljei, mi pakpak mönö ölop kondot enņiiga oyaenķoyaenķ akņe.

¹⁰ Toņi mi aiga Anutunöņ i Melkizedek ewö jike nup galöm bohonņi akņapkö jim teköba al waņgiyök. Mewö.

Mötnaripkö ölni sohobapukö galöm meme keu

¹¹ Keu mi ölop toroqeba gwötpuk jim qaribinakmö, enņön keu möta wuatañğöbingö taņqaņ aka gaunjeje akze. Mianğöra mi jim asarim enņibingö osikoši akzin.

¹² *Inini nalö köröpņi könagesö walņi mala ölop nalö kewöņe lök böhi qaçazu akņeañğö dop akeakmö, nanņinak Anutugö keu kötni mutukņi mi kunņan dumņe kunbuk kusum enņimapköra osimakze. Inini mönö qaköba Buņa keu mi juzu ewö nemingö mötze. Nene köhöikņi ewö mi nemingö osimakze.

¹³ Kunņan mi juzu ewö nembra maljawi, yaņön mönö toroqeba morösesepewö akza. Anutugö jeņe solanņi akingö keu kusum enņiinmö, yaņön mianğö könaņi qahö möt kutuba tönpin malja.

¹⁴ Morösesepewö maljapmö, nene köhöikņi mi ambazip mötmötninan qarivyöhi, mönö yeņön nemegöra aka ahöza. Ambazip Buņa keu sundan köl guliba malgetka urumötmötninan lök möņaiiga ölop amqeba silik pakpak kewöta ölopņi aka bölöņi mendenj etkiba ölopņi wuatañğömakze. Nene köhöikņi mi yeņğöra aka ahöza.

* 5:12: 1 Kor 3.2

6

¹ Mianğöra Kraist könañangö keu kötni mutukñi lök möta mianğörej mönö kude çaköbin. Mewö çahöpmö, mönö toroqeba qariba aködamuninambuk akingö kapañ köla malbin. Mötnaripkö tandöñi lök kuñguba mi mönö dumñe kunbuk könahiba kuñgubinbuk. Tandö mi uruñine kewö kuñguin: Ahakmemenini köhömuñi mosöta urunini melenđa Anutu möt narim wañiin.

² Urunini melenñinga mötnaripkö keu kemañi kemañi kewö kusum neñgigetka mörin: Sinğisöndoknini köl köñjöratmegöra o melun aka amötqeçe könañi könañi miengö könañini kusum neñgiget. Böröñini çaknine alalgö könañi kusum neñgiget. Guliba kömupnöhök wahötplingö könañi kusum neñgiget. Anutunöñ keunini jim teköi teteköñi çahö köhöikñi ahömapkö könañi kusum neñgiget.

³ Mötnaripkö tandöñi mewö kuñgubagun mönö toroqeba möt qaribingö mötzin. Anutunöñ ösum-mumu neñgimakzawañgö dop mönö aködamunini pakpak miwikñaibingö kapañ köla kinbin.

⁴ Mewö kinbingö möta mianğörej çaköba etpinbuköra aka kinjin. Ambazip kewöñi mi uruñini melenñmegöra enğuañgitpingö osimakzin: Tosatñan uruñini nalö kunöñ asariiga Anutunöñ Suep kalemñi enğii möta söñgaigetka Uña Töröñan ösupköm enğii malget.

⁵ Anutu Buña keuñangö nahömñi mötketka oyaençoyaen nalö könañgepñangö kukösumñan mönö uruñine gei mötket.

⁶ Mi pakpak mötagun mönö mötnaripñini mosöta Anutu andö qeget. Ambazip mi uruñini

kunbuk melenmegöra enġuaŋgitpingö osimakzin. Yeñön Anutugö Nahönñi ilita dumje kunbuk maripomnöñ qeġe ewö memba et ala aukje gamu qem waŋgimakze. Mewö mianjön mönö nanñini geñmororoñ ak aŋgumakze.

⁷ Mi söpsöp keu kianġö dop: Kienöñ nalö gwötpuk yöhöba gölme qakje eta uruñe geba gölme mem keloriga nup toñanġö welenqeġeurupñan nene kömötkeka Anutunöñ gölme kötuetköiga öljä asuhui kölkömöt toñi yeñön mi memba köweñine alakze.

⁸ *Mewö alakzemö, koururuk aka siriuret wahinambuk mianjön gölmenöñ asuhuba wahörakzawi, gölme mianjön mönö nesakñi akza. Toñi yeñön mi saiköbingö mötze aka kapañ köla mambötkeka öljä qahö asuhui eka teteköñe mönö kuñgugetka jema.

⁹ O wölböt alaurupni, neñön söpsöp keu mewö jizinmö, mi töndup inñini uruñini melenġa malmeanġöra mönö uruyahöt qahö akzin. Enġö uruñine Buña keugö öljän mönö asuhum qarimapköra möta awösamkakak kinjin. Anutunöñ öljä mi eka mönö meköm enġii letota Suepnöñ öñgöme.

¹⁰ Anutunöñ mönö ekbonep qakje gonġonji qahö akza. Inñini Anutugö ambazip sarakñi bauköm enġiba mala kota toroqeba bauköm enġiba nup memba malakze. Mewö urukalemñini Anutu kon-del waŋgigetka qetbuñanñan qarimakzawi, yañön nupñini aka urukalemñini mianġöra mönö qahö ölum qeiga kitipñi melen enġima.

* 6:8: Jen 3.17-18

11 Nini oyaenƙoyaen akingö jörömqöröm aka mianğoren awösamkakak uruyahöt qahö kinmegö sihimnini möta kewö awöwenğömakzin: Inini nanjök nanjök Anutugö urukönöp ahakzei, miyöhök mönö toroqeba kondela malme. Aködamun-ninambuk akingö kapan köla gölmenöŋ mal tekömeanğö dop mianğoren mönö kude löwörime.

12 Qölzöm akepuköra mönö awöwenğömakzin. Anutunöŋ oyaenƙoyaen yuai nenğimamgö keu jöhöyöhi, tosatŋan Anutu möt nariba sihimbölöŋini möta mökösoŋda mewö mianjön mi buŋa qem anğumakze. Inini yenğö silikŋini wuatanjömegöra mötzin. Mewö.

Anutugö jöhöjöhö keu mi uruyahöŋi qahö.

13 Anutunöŋ Abraham jöhöjöhö keu wanğiba mi nanji qetŋi qeta jöjopaŋ keuŋan jim köhöiyök. Kunöŋ Anutu onğita öngöngöŋi malbawak, ölop yaŋgö qetŋi qetpawakmö, mewöŋi kun qahö maliga mianğöra mönö nanji qetŋi qeta jöjopaŋ keuŋi jiiga köhöiyök.

14 *Jöhöjöhö keuŋi mi Abrahamğöra kewö jiba jiyök, “Nöŋön mönö ölna kötuatköm gihimam. Mönö ölna gwölönarök gihibiga sehime.”

15 Mewö jiiga Abraham yuai wanğimapkö keu jöhöi ahöyöhi, yaŋön mi ölnambuk akŋapkö kapan köla mamböta mala ölni buŋa qem anğuyök.

16 Ambazipnöŋ ketanamŋinanğö qetŋi qeta jöjopaŋ keu jiget mörakze. Jöjopaŋ keuŋinan keu jizei, mi mem köhöiiga qeapköbingö osigetka keu jijiŋinan teköza.

* 6:14: Jen 22.16-17

17 Miangö dop Anutunöŋ keuŋi Abrahamgö gwölönarökurupŋi neŋön mötpingöra jöhöba jiyök. Keu areni mi kunöŋ qeapköba utekömamgö osizawi, gwölönarökurupŋi neŋön jöhöjöhö keu miangö könaŋi mi törörök möt yaköbingö mörök. Miangöra jöhöjöhö keuŋi jiiga mutukŋi aiga keu mi kunbuk jöjopaŋ keuŋan jim köhöiiga indimŋi yahöt ahök.

18 Anutunöŋ keu mi jiba miangö munen jimamgö osiyök. Yaŋön keu utekutekŋi qahö mi jibagun jim köhöiyöhi, mianön mönö urunini naŋömapköra mörök. Miangöra mi jibagun jim köhöiyök. Neŋön gölmegö ahakmeme bölöneyök ölöŋ köla Anutugöreŋ aŋgota oyaenköyaen neŋgimapkö jörömqöröm neŋgiyöhi, mi mönö töp memba mamböta maljin.

19 *Oyaenköyaen akingö al mamböta miangö uruyahötŋi kun qahö ahakzin. Jörömqörömnini mianön uruninaŋgö kösö mendanŋi tandök ewö aka nini Jisösbuk jöhöm neŋgimakza. Jörömqörömninaŋgö kösö mendanŋi köröpŋi mianön mönö neŋgöreŋök könahiba Suep jikegö uruŋe öngöba jike oleni yahötkö sutŋire opo sel ahözawi, mi mewöyök kutuba toroqeba Jisös jakömbuak dum kömbukŋe tatzawaŋgöreŋ anja.

20 *Jisösnöŋ mönö jitŋememenini aka mutuk eu-yaŋgöreŋ öngöba jakömbuak dumŋi memba nalö teteköŋi qahö tat öngöma. Mewö Melkizedek ewö jike nup galömnini bohonŋi aka malja. Mewö.

7

* 6:19: Lew 16.2 * 6:20: Sum 110.4

Jike nup galöm Melkizedekö kösohot

¹ *Melkizedek azi mi miri qetñi Salem miangö kiñ kembuñi aka Anutu öngöngöñangö jike nup galömña malök. Mewö maliga Abrahamnön kiñ kembuñi kembuñi bim qeba luhut al engiba lilingöba miriñe kayöhi, nalö miangören kaba Abraham miwikñaiba kötuetsköm wañgiyök.

² Kötuetsköm wañgiiga sukinapñi pakpak mendenja ten miengörenök mohot mohot (1/10) memba nalukña al wañgiyök. Melkizedek qet miangö könani mi “ahakmeme solanñangö kiñ kembuñi.” Qetñangö dop mutuk “ahakmeme solanñangö kiñ kembuñi” ahök aka toroqeba mewöyök “Salemgö kiñ kembuñi” malök. Salemgö kiñ kembu qet miangö könani mi “luaigö kiñ kembu”.

³ Melkizedeknön iwinamñi aka saiwaurupñi qahö, ahuahu nalöñi qahö aka kömukömuñi qahö.* Mewö jike nup galöm bohonñi aka nalö teteköñi qahö mal öngöma. Yanön Anutugö Nahönñangö tandök ewö akza.

⁴ Bömönjalönini Abrahamgö gödaqqe silikñan Melkizedekö könani kondeli mi kewö ek asarime: Abraham nanñak sukinap yuai aködamunñambuk kalöpköba memba kayöhi, miengörenök börö yahöt (10) pakpak kewöta bahöñi mohot memba Anutugö nalukña al wañgii miangöra Melkizedeknön mönö ölna öngöngöñi ketanji qainñi kun akza.

⁵ *Anutunön Köna keujan keu kewö jim kutum neñgii ahöza, “Liwaigö gwölönarökurup al engigetka

* **7:1:** Jen 14.17-20 * **7:3:** Buña Keunön Melkizedekö iwinamñi aka saiwaurupñi, ahuahu aka kömukömu nalöñi mi qahö jim asariza. * **7:5:** Jan 18.21

jike nup meme azi (Liwait) aketka könagesö enjön mönö sukinapņini börö yahöt (10) pakpak kewöta mienğoreņök bahöņi mohot memba Anutugö naluha al enğimakņe.” Yeņön inini ewö Abrahamğö gwölönarökurupņi akzemö, mi töndup nanņini könagesöurupņini enğö böröņineyök naluknini mi buņa qem anğumakņe.

⁶ Jimkutukutu keu mewö ahözapmö, Melkizedeknöņ Liwaigö gwölönarökņi kun qahö akza. Mi töndup Abrahamnöņ Anutugö jöhöjöhö keu möt anğön köla mala sukinapņi kewöta tenöhök mohot memba Anutugö nalukņa alöhi, mi mönö buņa qem anğuba kötuetköm wanğiyök.

⁷ Ketaņamninaņğö nembö bapņine maljini, yeņön mönö kötuetköm neņgigetka maljin. Keu mi qaņ kölbingö osimakzin.

⁸ Könagesö neņön tenöhök mohot memba Anutugö naluha alakzini, mi gölmegö jike nup meme (Liwait) ambazipnöņ buņa qem anğumakze. Yeņön gölmenöņ mala kömumakzemö, Sup mire euyañğoreņ kungöra naņğöba jigetka köhöiba mal öņğömawi, yaņön mönö mi buņa qem anğumakza.

⁹ Abrahamnöņ sukinapņi kewöta börö yahöt (10) pakpak mienğoreņök bahöņi mohot memba Anutugö nalukņa alöhi, yaņön mi gwölönarökņi Liwaigöra mewöyök qeljiņe alök. Mewö jiinga ölop dop kölbawak. Nalö kewöņe tenöhök mohot memba Anutugö nalukņa alakzini, mi bömönini Liwaigö gwölönarökurupņan buņa qem anğumakze.

¹⁰ Liwaigö salupņe mewöyök naluk alöhi, mianğö könaņi kewö: Liwainöņ amböņañğö körö uruņe tariga Melkizedeknöņ mönö nalö mianğoreņ kaba Abraham miwikņaiyök. Mewö.

Melkizedek mi Jisösgö söpsöpñi akza.

¹¹ Anutunöñ Köna keunjan Israel ambazip jim kutum neñgiiga miangö dop Liwai kambunöhök azi kungum enjiinga jike nup galömnina aket. Nup mi megetka mewö mianön aködamunini pakpak miwikñaibinak ewö, nini mönö jike nup galöm qainñi kungöra qahö osibinak. Nup miangö ölnjan qahö dop kölöhañgöra aka Jisösnöñ mönö Melkizedek ewö asuhuyök. Ambazipnöñ i Arongö areñangö dop qahö kungugetka asuhuyök.

¹² Jike nup galöm nupñangö könañan uteközawi, nalö miangöreñ köna keuninan mönö mewöñanök uteköza.

¹³ Jike nup galöm qainñi kun keu mi Kembuninangöra jizinmö, yañön Liwai kambunöhök qahöpmö, mönö kambu kunöhök asuhuyök. Kambu miangö azi kunñan mönö jöwöwöl jikegö altanöñ kinda nup qahö memba malök.

¹⁴ Kembuninan Juda kambunöhök asuhuyöhi, keu mi aukñe ahöza. Mosesnöñ Juda kambu yeñön jike nup galöm kölmegö keu kun qahö jiyök.

Jike nup galöm Melkizedek ewö kun

¹⁵ Miangöra jike nup galöm kun Melkizedekö tandök ewö asuhuzawi, mianön mönö keu jiz-inangö ölnji mi aukñeyök kondeliga dopñe akza.

¹⁶ Yañön gölme ambazipnöñ Köna keu wuatangöba kambuñangö dop jim kutugerangöra aka jike nup galöm qahö ahökmö, malmal köhöikñi qahö ayapkömawi, miangö kukösumñan mönö nam köl wañgiiga jike nup galöm ahök.

17 *Kunöŋ yangö könaŋi naŋgöba jiiga Buŋa Kimbinöŋ kewö ahöza, “Göŋön Melkizedek ewö jike nup galöm aka nalö teteköŋi qahö mal öŋgöman.”

18 Anutunöŋ mewö jiba jimkutukutu mutukŋi mi qeapköyök. Keu mianğö kukösumŋan qahöwahiga bauköm neŋgimapkö osimakzawi, mianğöra mi qeapköyök.

19 Köna keunöŋ ambazip aködamunini miwikŋaibingö qahö bauköm neŋgiyök. Qahö. Mianğöra keu areŋ mutukŋi qeköba salupŋe jörömqöröm qetpuk sorok neŋgiza. Nini jörömqöröm mianğö qakŋe kindä ölop Anutugö kösutŋe anda köulukömakin.

20 Anutunöŋ jike nup galöm dölökŋaŋgö keuŋi jiba mi jöjöpaŋ keuŋan jim köhöiyök. Mewö ahökmö, jike nup galöm tosatŋi yeŋgö keuŋini mi jöjöpaŋ keunöŋ qahö jim köhöigetka töndup mewö aket.

21 *Tosatŋan jike nup galöm öne aketmö, Anutunöŋ Jisös kuŋguba keuŋi mi jöjöpaŋ keuŋan jim köhöiba yangöra kewö jiyök, “‘Gi mönö jike nup galöm aka nalö teteköŋi qahö mal öŋgöman.’ Kem-bunöŋ keuŋi mi jöjöpaŋ keuŋan jim köhöiba uruŋan mi qahö uteköma.”

22 Jöjöpaŋ keu mianğöra aka Jisösnöŋ mönö jöhöjöhö areŋ dölökŋaŋgö öŋi asuhumapkö galömŋi akza. Mewö Anutu aka ambazip sutnine nup memba malja. Jöhöjöhö areŋ mianğön walŋi oŋgita qetpuk sorok akza.

23 Jike nup galöm tosatŋi mi mönöwök gwötputuk malget. Kömumba nupŋini toroqeba memingö

* 7:17: Sum 110.4 * 7:21: Sum 110.4

osigeri, miangöra mi mönö gwötpuk malget.

²⁴ Yeñön gwötpuk malgetmö, Jisösnöñ nalö teteköñi qahö mal öngömawi, miangöra jikegö galöm nup mi mönö teteköñi qahö memba mal öngöma.

²⁵ Nup mi memba maljawangöra Jisösnöñ ambazip yangören kagetka enguangiri Anutugö kösutje anakzei, mi ölop köhöiba amöt qem engii keunjan kömumakza. Nalö dop yengöra aka Anutu köulukömak-ñapköra maljawi, miangöra mönö ölop amöt qem neñgim tekömakza.

²⁶ Jike nup galöm bohonñi mewöñan mönö ölop dop köl neñgiza. Yanön töröñi köpösihitkö keunji qahö aka sarakñi akza. Anutunöñ Jisös singisöndok ambazip neñgörenök tiriñ kutuba wangiri Suep jakeni pakpak kutuba euyangören öngöba qainñi kun akza.

²⁷ *Jike nup galöm tosatñan sömañi sömañi mutuk nanñini siñgisöndokñinangöra aka miangö andöñe könagesö yengö siñgisöndokñinangöra aka sömbupnöñ jöwöwöl ohoba maljema. Jisösnöñ nanñi silenji köleñniga jöwöwöl ohoho ewö ak wangigetka mewö mianön könagesö neñgö siñgisöndoknini mi indim mohot miangörenök lök köl köñjörari dop köl teköza. Miangöra Jisösnöñ mi jike nup galöm tosatñi ewö nalö dop ahakñapkö qahö osiza.

²⁸ Anutunöñ Köna keunji Moses wanggiiga miangö dop ambazipnöñ azi mi kuñgum engigetka jike nup galöm bohonñi ahakze. Gölme azi yeñön kukösumñini qahö maljemö, Anutunöñ oyaenköyaen akingö keunji mi könañgep neñgiba mi

* 7:27: Lew 9.7

jöjöpaŋ keuŋan jim köhöiyöhi, mianğö dop Nahönŋi kuŋguiga bohonini akza. Bohonini yaŋön mönö aködamunŋi körek pakpak lök miwikŋaiba nalö teteköŋi qahö köhöikŋi mal öngöba malma. Mewö.

8

Jöhöjöhö areŋ dölökŋaŋğö jike nup galöm bohonŋi

¹ *Keu jizini, mianğö keu kötŋi bohonŋi mi kewö: Nini mönö jike nup galöm bohoninambuk akzin. Bohonini yaŋön mönö Suep mire öngöba Öngöngöŋamnini yaŋğö jakömbuak dum tatat qöhöröŋe böröŋi ölnę tatza.

² Opo seri jike ölnę mi Suepnöŋ ahöza. Mi gölme azinöŋ memenę qahöpmö, Kembunöŋ nanŋak mi meyök. Jike nup galöm bohonini yaŋön mönö opo seri jikeğö olenę töröŋi kötökŋi mianğöreŋ mala Anutu welenŋi qemamğö nupŋi memakza.

³ Gölmegö jike nup galöm bohonŋi pakpak mi naluk kalem Anutugöra ala sömbupnöŋ jöwöwöl ohoba malmegöra kuŋgum engimakzin. Mianğö dop jike nup galöm bohonini Jisösnöŋ mewöŋanök nanŋi Anutugö nalukŋa al waŋgiyök.

⁴ Mosesğö Köna keugö dop naluk kalem Anutugöra alakingöra azi lök kuŋgum engigetka malje. Mianğöra jike nup galöm bohonini mianğön gölmenöŋ malbawak ewö, yaŋön mönö gölmegö jike nup galömŋi akŋamğö osibawak.

⁵ *Gölmegö jike nup galöm yeŋön gölmegö jöwöwöl jikenöŋ Anutu welenŋi qebingö nupŋi memakze. Jike mianğön mönö Suep jike kömbukŋaŋğö söpsöpŋi aka imutŋi akza. Mosesnöŋ

* 8:1: Sum 110.1 * 8:5: Eks 25.40

jike kömbukñi opo serinöñ memamgö ahöhi, nalö mianğoreñ Anutunöñ Suep jikeñağgö areñi mi indelök. Indel teköba galöm meme keuñi kewö jii mörök, “Mötnöñ, kundunę malnöñga areñ kondel gihiali, yuai pakpak mönö mianğö dop törörök wuatangöba memam.” Mianğö dop opo serinöñ jöwöwöl jike meiga mianğön mönö Suep jikegö korembiñi ahök.

⁶ Anutunöñ oyaenköyaen akingö jöhöjöhö keu dölökñi neñgiiga mianğön jöhöjöhö keu walñi oñgita ölop sorokñi akza. Jöhöjöhö keu mianğön areñ dölökñağgö tandöñi akza. Jöhöjöhö areñ dölökñi mianğön mönö areñ walñi oñgita qetbuñañambuk akza. Qetbuña mianğö dop Jisösnöñ jöhöjöhö areñ dölökñağgö nupñi ölop sorokñi mi buña qem añguba Anutu aka ambazip sutnine kinda bauköm neñgimakza. Nupñi mianğön mönö gölmegö jike nup memeni mi gwötpuk oñgita aködammunñambuk akza.

⁷ Jöhöjöhö areñ mutukñan keuñi qahö aka dop kölbawak ewö, jöhöjöhö areñ könañgepñan asuhumapköra öne qahö mamböt-pinak.

⁸ *Mewömö, ambazipnöñ töndup böligetka Anutunöñ könañini miwikñaiba jim engiba kewö jiyök, “Kembu nöñön kewö jizal: Mötket! Nalö kun kam kuñgumawi, mianğoreñ Israel kambu aka Juda kambu embuk jöhöjöhö areñ dölökñi akñam.

⁹ Nöñön ambösakonurupñini böröñine memba Ijipt kantrinöhök enğuañgitpiga yaigep kagetka yembuk jöhöjöhö areñ ahalmo, yeñön nöñgö jöhöjöhö areñ mi qahö qekötahöba tem kölget. Mianğöra nöñön mewöñanök i

* 8:8: Jer 31.31-34

andö enɣuyal. Kambu nõñõn mewõ jizal. Jõhõjõhõ areñ dõlõkñi akñami, mi Buña keu walñanɣõ dop qahõ.

- 10 Mewõ qahõpmõ, nalõ mianõn kam kuñguiga Kambu nõñõn mõnõ Israel kõnagesõ yembuk jõhõjõhõ areñ dõlõkñi kewõ aka jimam: Nõñõn mõnõ nani Kõna keuni pakpak mi yeñgõ mõtmõtñine ala uruñine kimbi ewõ ohobi ahõma. Mewõ aka yeñgõ Anutuñini akiga yeñõn mõnõ nõñgõ kõnagesõni aka malme.
- 11 Nalõ mianɣõreñ ketanji morõñi mi kõrekmakõrek nõñgõ kõnani mõt yakõba malme. Mianɣõra bõhi kunõñ Kambuɣõ kõnanji mõtmegõra sutñine qahõ kusum enɣiba malma. Datñan munñanɣõra kewõ qahõ jima, ‘Gi mõnõ Kambu mõt yakõman.’
- 12 Kewõgõra ni mõt yakõm niñgiba malme: Nõñõn ahakmemenji ni bõlõñi mi sanɣõnda mosõtman. Siñgisõndokñinañgõra mõnõ õlum nuñgui mi qahõ toroqeba mõtmõrimam.”
- 13 Anutunõñ jõhõjõhõgõra “Dõlõkñi” jiba mewõ mianõn jõhõjõhõ areñ mutukñanɣõra “Mõnõ walñi ahõk,” jiiga kõnanji mewõ asuhuyõk. Keu areñ kunõñ nalõ kõrõpñi ahõba walñi akzawi, mianõn mõnõ ayapkõmamgõ dop akza. Mewõ.

9

Gõlmeɣõ opo seri jikenõñ Anutu kewõ mõpõseiget:

- 1 Anutunõñ jõhõjõhõ areñ mutukñi aka mianɣõreñ mewõyõk waikñi memba mõpõseibingõ

areñi mi jim kutui wuatangöget. Mi wuatangöba gölmenöñ opo seri jike megetka ahöyök.

² *Anutugö opo seri jike kömbukñi mi kewö meget: Jike oleni mutukñi miangören lambegö dum tatatñi aka beret kömbukñi mi Anutugö jemesoholñe tebolnöñ buñaña alget tarök. Jike uruñi miangö qetñi mi jike oleni kömbukñi.

³ *Miangö andöñe jike uru qetñi jike oleni töröñi kötökñi mi ahöyök. Jike oleni yahöt mietkö sutñire opo sel kinök.

⁴ *Jike oleni töröñi kötökñi miangören jiniñ ohohogö altañi aka jöhöjöhö arengö bokisñi mi ahöyohot. Altañi mi goulñöñ memenñi aiga bokis silenñi mi körek goulñöñ turuturuñi ahök. Paura qetñi mana mi goul kumbutnöñ ala bokis miangö uruñe galöm kölget. Mewöyök Arongö öröpñi sötni jujulñi aka Anutunöñ jöhöjöhö areñi kötnöñ ohoi ilanñi mi bokis miangö uruñe galöm kölget. Bokis uruñe yuai karöbut mi mewö ahöget.

⁵ *Bokis qakñe imut yahöt goulñöñ memenñi mi Anutunöñ dowe mali asakmararañangö söpsöpñi aka kinohot. Imut yahöt mi ginginñiri kötula bokis önunñi turuba kinohot. Bokis önunñi mi Anutugö köl könjörat dumñi ahök. Keu mohot mohot mi nalö kewöñe nanñök nanñök törörök eraum mötpinañgö dop qahö.

⁶ *Anutugö opo seri jike kömbukñangö yuai pakpak mi mönö mewö arengögetka ahöiga jike nup galöm yeñön nalö dop jike oleni mutukñi

* **9:2:** Eks 26.1-30; 25.23-40 * **9:3:** Eks 26.31-33 * **9:4:** Eks 30.1-6; 25.10-16; 16.33; Jañ 17.8-10; Eks 25.16; Dut 10.3-5
 Eks 25.18-22 * **9:5:** Eks 25.18-22 * **9:6:** Jañ 18.2-6

miaŋgöreŋ öŋgöba Anutu welenni qeba nupŋini memba malget.

⁷ *Mewö malgetmö, jike nup galöm bohonŋi yaŋönök (yara) yambu dop indimŋi mohot miaŋgöreŋ jike oleni töröŋi kötökŋi miaŋgöreŋ öŋgöba malök. Sep memba miaŋgöreŋ öŋgöba nanŋaŋgöra aka könagesö yeŋön gukmaulem qakŋe ŋiŋgisöndok akeri, mönö miaŋgöra aka jöwöwöl ohoba sepŋi mokoi erök.

⁸ Mewö areŋgöba aketka Uŋa Töröŋan söpsöp mi kondela miaŋön ambazip kewö kusum neŋgiba malök: Jike oleni mutukŋan toroqeba kinjawi, nalö miaŋgöreŋ Anutunöŋ jike oleni töröŋi kötökŋaŋgö könaŋi mi aukŋe qahö indeliga malget.

⁹ Keu mi nalö kewöŋaŋgö söpsöpŋi akza. Könaŋi kewö: Ambazipnöŋ kalemŋi kalemŋi naluk ala jöwöwöl memba kagetka ohomakzemö, uruŋinan töndup luai miwikŋaibingö osimakze. Uruŋinan ŋiŋgisön-dok akerŋgöra aka tölöhoi jöwöwöl memba kaba Anutugö jike kömbukŋe öŋgöba köulukömakzemö, miaŋön mönö ŋiŋgisöndok-ŋini köl könjöratpingö osimakze.

¹⁰ Nene kalem aka o kalem memba kaba an köl kam köl aketka o melun könaŋi könaŋi mem eŋgim�akzemö, mewö silegö jimkutukutuŋi miyök wuatŋgömakze. Yuai mi mutuk dop köli aka malgetmö, Anutugö areŋ döläkŋaŋgö nalöŋan kam kuŋguiga miaŋgöreŋök könahiba qahö toroqeba dop kölma. Mewö.

Kraistkö sepŋaŋgö könaŋi

* **9:7:** Lew 16.2-34

11 Kraistnön kaba oyaenƙoyaen neŋgimakzawaŋgö jike nup galöm bohonji ahöhi, yaŋön gölmegö opo seri jike kömbukŋi azinön memenji mianğoreŋ qahö öngöyökmö, mönö Suepkö jike kömbukŋe öngöyök. Jike kömbukŋi mianjön öngöŋgöŋi akza. Aködamunŋan mönö asakmararaŋambuk.

12 Mianğoreŋ öngöba uruŋi mutukŋi kutuba meme (noniŋ) aka bulmakau moröŋi miengö seŋŋini qahö memba anökmö, nanŋi seŋŋi mokoiga mianjön nam köl waŋgiiga Suepkö jike oleni töröŋi kötökŋi mianğoreŋ öngöyök. Mianğoreŋ nalö mohotkö dop öngöiga dop köl teköza. Sohpnini mewö memba oyaenƙoyaen akingö kondoriga nalö teteköŋi qahö dop köla ahöm öngöma.

13 *Mutuk meme (noniŋ) aka bulmakau aziŋi enguba seŋŋini memba kaba bulmakau ambi seramŋi mianjön jöwöwöl ohoba mianğö bupgahajöŋi mewöyök memba kaba ambazip kölköl-jiŋjiŋinambuk mianjön qewösahöba engömirigetka dop köl engiyök. Mewö amöt qem engigetka mianjön silenini saŋgoŋda mem sarahim engii malget.

14 Mewö aket ewö, Kraistkö seŋŋan mönö amötqeqe tandök mi gwötpuk oŋgita kewö ak neŋgimakza: Seŋŋan mönö urunini tölöhoi saŋgoŋda kömup köhöikŋaŋgö buŋa akingö ahakmemenini mi köl könjörarakza. Mewö ak neŋgiiga malmal Toŋi Anutu welenni qebingö nupŋi mi amqeba memba malbin. Uŋa Töröŋan

* 9:13: Lew 16.15-16; Jaŋ 19.9, 17-19

mala kota teteköni qahö mal öngömawi, yañön mönö Kraist bauköm wanjiiga köpösihitni qahö malökmö, neñgöra aka nanni köleñ anguba Anutugö jöwöwöl lamanji ahök.

15 Könañi kewögöra Kraistnöñ jöhöjöhö areñ dölökñañgö galöm bohonñi akza: Anutunöñ ambazip oyaenköyaen aka nalö teteköni qahö mewö malbingö keu jöhöba engoholöhi, mienñön Anutugö Buñañi mi buña qem angumegöra mötza. Miangöra Kraist aliga Anutu aka ambazip sutnine urumohot akingö nupñi memba malja. Jöhöjöhö areñ mutukñañgö nalöñe ambazipnöñ köna ongita sinjisöndok aketka mianñön jöhöm engii malgeri, Kraistnöñ i mienögöreñök pösat engimangöra aka kömumba sohoppñini meyök.

16 Kunñan öroyuaini pakpak malmalñi tekömawi, miangöreñ alañgö buñañi akñaapkö jim kutui keu ahözawi, alañan buña mi zilañ qahö mema. Zilañ qahöpmö, keu tonjan kömui könañan aukñe asuhui eketka miangöreñ mi ölop buña qema.

17 Jebuk maliga nalö miangöreñ keuñi mianñön ölnambuk qahö akñaapkö, keu tonjan kömuigun keuñan mönö kukñambuk akña.

18 Keu miangö dop jöhöjöhö areñ mutukñi mi mewöyök sep qahö öne ölnambuk qahö ahök.

19 *Ölnambuk kewö ahök: Mosesnöñ Köna keugö jöjöpañ keu pakpak mi könagesö körek yengöra oyondagun mönö bulmakau moröñi aka meme (nonin) enjuiga sepñinan erök. Eri mi memba obuk mindiriba lama jupñi pisikñi gugakgugak memba songorep sunje jöhöba sepñöñ kundumgöba

* 9:19: Eks 24.6-8

qewösahöi Köna keu Kimbi lama silene ohoba lipiŋgögeri, mi miriyök. Mi miribagun könagesö pakpak sutŋine liliköba sep onöŋ kundumgöba giliga mianön qewösahöi engömiriyök.

²⁰ Mewö engömiriba kewö jiyök, “Anutunöŋ keuŋi tem kölmegöra jim kutum engiba embuk jöhöjöhö akzawi, mönö miangö sepŋa ki.”

²¹ *Mewöŋanök opo seri jike kömbukŋi mi tok sepnöŋ kundumgöba giliga mianön kundumgöba miriyök. Amötqeqe nup memegö aködamun yuaini pakpak mi mewöyök kundumgöba gili miriyök.

²² *Köna keunöŋ jim kutuzawaŋgö dop i me wai pakpak mi mönö sepnöŋ saŋgoŋninga sarakŋi ahakza. Kunöŋ sep qahö mokoza ewö, Anutunöŋ mönö siŋgisöndoknini qahö mosötma. Mewö.

Kraistkö sepŋan siŋgisöndoknini köl könjörarakza.

²³ Suep jike kömbukŋaŋgö söpsöp imutŋi imutŋi mi gölmenöŋ jöwöwöl ohoho aka mewö mianön amöt enğugetka sarakŋi aketka dop köljapmö, Suepkö öröyuaigöra mi qahö dop kölja. Miangöra Kraistnöŋ jöwöwöl ohoho qainŋi kun aka mianön Suep jikegö öröyuaini pakpak mi mönö amöt enğuiga sarakŋi aketka dop kölök. Jöwöwöl ohoho qainŋi kun mianön mönö gölmegö jöwöwöl ohohoni oŋgita aködamunŋambuk akza.

²⁴ Miangö könaŋi kewö: Kraistnöŋ jöwöwöl jike oleni töröŋi kötökŋi azinöŋ memenŋi miangören qahö öŋgöyök. Mi Anutugö jike ölnaŋgö söpsöpŋi miyök ahök. Kraistnöŋ mönö Suep miri ölni miangören öngöba nalö kewöŋe bauköm

* 9:21: Lew 8.15 * 9:22: Lew 17.11

neŋgimakŋapköra jitejemenini aka Anutugö jemesoholŋe asuhumakza.

²⁵ Jike nup galöm bohonŋan yambu (yara) dop sömbup seŋŋini memba jöwöwöl jike oleni töröŋi kötökŋi miangörenŋ öngöba malök. Kraistnöŋ miangö dop qahö ahakza. Yaŋön Suep mire indimŋi gwötpuk qahö öngöyök. Anutugö jöwöwöl lamani aiga yambu (yara) dop qemakŋegöra aka eu qahö öngöyök.

²⁶ Indimŋi mohotŋan qahö dop kölbawak ewö, yaŋön mönö Anutunöŋ Suep gölme miwikŋaim etkiyöhi, nalö miangörenök könahiba sihimbölöŋi bölöŋi möri indimŋi sehisehiŋi akawak. Mewö qahöpmö, gölmegö nalöŋan tekömamgö aiga nalö kewöŋe indim mohot miyök siŋgisöndok köl könjöratmapköra aka asuhuyök. Asuhuba nanŋi jöwöwöl ohoho ewö ak waŋgimegöra al aŋguyök.

²⁷ Gölme ambazip neŋgö areŋnini kewö ahöza: Nini nalö kunöŋ kömumbin aka miangö andöŋe Anutunöŋ keunini kewöta jim teköm neŋgima.

²⁸ *Areŋ miangö dop Kraistnöŋ mewöŋanök ambazip sehisehiŋi neŋgö siŋgisöndoknini köl könjöratmapköra indim mohotkö dop kaba nanŋi jöwöwöl ohoho ewö ak waŋgimegöra al aŋguyök. Yaŋön nalö kunöŋ lilingöba kama. Siŋgisöndököra aka kunbuk qahö kamapmö, ambazip asuhumapkö mambörakzini, mönö nini oyaenŋkoyaen neŋgiba neŋguaŋgitmapköra aka asuhuma. Mewö.

10

* 9:28: Ais 53.12

Indim mohot kömupnöŋ al anŋui dop köl teköza.

¹ Köna keu walŋi mianŋön oyaenŋkoyaen akingö könaŋi ölni qahö akzapmö, oyaenŋkoyaen asuhumawaŋgö imutimutŋi miyök ahöza. Köna keugö könaŋi mewö ahözawaŋgöra aka ambazip Anutu möpöseibingöra jike kömbukŋe nalö dop öngömakzei, yeŋön mönö letota aködamunŋinambuk akingö osimakze. Yeŋön nalö teteköŋi qahö naluk kalem waŋgita ala jöwöwöl ohoho miyök yambu (yara) dop toroqeba aka malgetmö, mianŋön qahö dop kölök.

² Mianŋön dop kölbawak ewö, jöwöwöl ohoho mi ölop mosötpeak. Jike kömbukŋe Anutu waikŋi memba möpöseigeri, yeŋön indim mohot amöt enŋugetka sarakŋi ak teköbeak, mewö mönö ŋiŋisön-dokŋinaŋgö gamuŋi mi qahö toroqeba mötpeakmö, mi toroqeba mötket. Mianŋöra sömbup kalem mi toroqeba nalukŋina almalget.

³ Yambu (yara) dop jöwöwöl ohoba malgeri, mianŋön mönö toroqeba ŋiŋisöndokŋinaŋgö gamuŋi mi jim gulim enŋii malget.

⁴ Bulmakau aziŋi aka meme (noniŋ) yeŋgö sepŋinan mönö ŋiŋisöndok köl könjöratmapkö osiza. Mi esapkögetmö, qaköba mala kotket.

⁵ *Mianŋöra Kraistnöŋ gölmenöŋ eta asuhuyöhi, nalö mianŋören kewö jiyök, “Anutu, göŋön naluk kalemgöra aka jöwöwöl ohome-göra qahö köpösöŋgöba malnöŋmö, gölmenöŋ malmalgö silenji mi mözözömgöba niŋginöŋ.

⁶ Jöwöwöl ohoba ŋiŋisöndokŋinaŋgöra aka naluk kalemŋi kalemŋi ala malgeri, mi eka

* **10:5:** Sum 40.6-8

mianğöra qahö sönğaiba malnön.

⁷ Nalö mianğörej kewö jial, ‘Anutu, mötnön, nönön ki kazal. Nönğö könani mi papia lipinlipinji mianğörej ohogetka ahöza. Mianğö dop mönö göhö sihingahö dop aka memba malmam.’”

⁸ Mutuk kewö jiyök, “Naluk kalem ala jöwöwöl ohoba singisöndokñinan solanimapköra yuai könani könani aka malgeri, mianğöra mönö sihingang qahö asuhui möta malnön. Mi eka mianğöra qahö sönğaiba malnön.” Yuai mi Köna keu walñangö dop toroqeba ahakzemö, mi töndup mewö jiyök.

⁹ Mianğö andönje keu kewö jiyök, “Anutu mötnön, nönön mönö ki kaba göhö jitsihitkahö dop aka memba malmam.” Mewö jiba Anutu waikñi memba möpöseibingö könani mutukñi mi qeapköba köna dölökñi kuñguyök.

¹⁰ Anutugö jitsihitñan nam köl wañgiiga silenjan jöwöwöl ohoho ewö aket teköi mianğöra mönö tök kutum neñgii sarakñi ak teközin. Indim mohotkö dop silenji köleñniga mianön nalö dop mönö söp köla ahöm öñgöma.

¹¹ *Nalöñi nalöñi jike nup galöm pakpak mienön kinda jike nupñini memakze. Sundan dop jöwöwöl ohoho miyöhök dumñe kunbuk ahakzemö, mienön singisöndokñini köl könjöratpingö osimakze.

¹² *Mienön osimakzemö, Suepkö jike nup galöm bohonñan mönö indim mohotkö dop singisöndököra aka silenji köleñniga nalö teteköñi

* **10:11:** Eks 29.38 * **10:12:** Sum 110.1

qahö dop köla ahöm öngöma. Jöwöwöl ohoho ewö ak wanğigetka Suep jikenöŋ öngöba Anutugö böröŋi ölŋe tatza.

13 Mianğöreŋ tata nalö sutŋi kianğöreŋ Anutunöŋ tuarenjoŋurupŋi tötali et enğuga Kraist könaŋaŋgö döŋŋi* aketka köiraŋ kölbingö mamböta malja.

14 Indim mohotkö dop kömupnöŋ al aŋgui jöwöwöl ohoho ewö ak wanğigetka mianğön dop köl teköi ölöp ambazip tök kutum neŋgii sarakŋi akingö dop akzin. Mewö ölöp mem letot neŋgiiga aködamunini pakpak miwikŋaiba nalö teteköŋi qahö mewö mal öngöbin.

15 Uŋa Töröŋan mewöyök keu mi naŋgöba jiiga mötzin. Mutuk keu kewö jii ahöza:

16 **“Kembu nöŋön kewö jizal: Nalö tosatŋan tekögetka mianğöreŋ mönö jöhöjöhö areŋ yembuk akŋami, mi kewö: Nöŋön Köna keuni pakpak mi mönö uru könömŋine ala mötmötŋine kimbi ewö ohomam.”*

17 **Mewö jiba kewö toroqeyök, “Nöŋön mönö yeŋgö siŋgisöndok-ŋini aka ahakmemenŋini iwilelebuk akeri, mianğöra ölum nuŋgui mi qahö toroqeba mötmöriba malmam.”*

18 Keu mianğö dop Anutunöŋ mi mosöri keuninan kömuyöhi, siŋgisöndok mienğöra jöwöwöl ohobinaŋgö dop qahö akzin. Mewö.

Anutubuk kapaŋ köla malbingöra neŋgohöök.

* **10:13:** Kerökurupŋi memba et al enğiba luhut ala gamu qem enğibingöra könaŋinan tuapköba qakŋine döŋ ewö tölanjiba malget. Juda yeŋgöreŋ köna mewö. * **10:16:** Jer 31.33 * **10:17:** Jer 31.34

19 Mianğöra urumelen alaurupnini, Jisösgö sepnan sanğon neŋgiiga mönö ölop Anutugö jike oleni töröni kötökni mianğoren öngöbin. Mewö möt narim köhöiba uruyahöt qahö ahakzin.

20 Jisösnöŋ köna anangö köna dölökni mesariga nanjak malmal köhöiknaŋgö könaŋi ak neŋgiza. Köna mi nanŋi silenŋi kölenŋa mewö mianğon mesari ahöza. Köna mi tiba Anutugö jikenanğö opo selni kutuba jike oleni töröni kötökni mianğoren öngöbin. Jisösgö silenŋan nam köl neŋgiiga opo selni mi ölop kutubin.

21 Jisösnöŋ jike nup galöm öngöŋgöŋi ak neŋgimakza. Yanğon Anutugö könagesöŋi pakpak galöm köl neŋgiba malja.

22 *Mewö maljawanğöra neŋon mönö geŋmon mosöta uruyahöt körek yaköriba pöndanğök mötnarip qakŋe kinda Anutugö kösutŋe anda köuluköba malbin. Sepnan qewösahöi neŋgömiriba uru tölöhopeni sanğonŋiga sarakŋi aka malbin. Uruninan qahö toroqeba jim neŋgiiga mönö awösamkakak malbin. O sarakŋi ariinga mem tuarim neŋgiiga mewö mönö Anutubuk qekötahöba malbin.

23 Anutunöŋ oyaenköyaen akingö keu jöhöba neŋgiyöhi, yanğon mönö keuŋi pöndan wuatangöba nembuk kinja. Mewö kinjawanğöra aka mewö akingö mamböta jörömqörömnji jim miwikŋaimakzin. Mianğoren mönö koŋgwarak mosöta zeŋ kin köhöiba malbin.

24 Urukalem aka ahakmeme ölopŋi akingöra mönö uru kuŋgum aka nanğöm anğuba malbin.

* 10:22: Lew 8.30; Eze 36.25

Mewö malbingöra mönö pöndaŋ galöm mem aŋguba malbin.

²⁵ Tosatŋan nanŋini urumelen könagesögö to-tokoŋini mosörakzei, neŋön mönö silik miangö dop kude aka malbin. Mewö qahöpmö, Kembu kamawaŋgö aiwesökŋi eka nalöŋan dopdowimapkö mötzini, miangö dop mönö kapaŋ köla köhöiba uru kuŋgum aŋguba malbin.

²⁶ Buŋa keu ölni mötagun nanini imbi-imbi qakŋe ŋiŋgisöndok laŋ akin ewö, ŋiŋgisöndoknini miangöra mönö naluk jöwöwöl kun albingö osibin. Jöwöwöl ohoho kun mi qahö bauköm neŋgima.

²⁷ *Mi qahö bauköm neŋgimapmö, Anutunöŋ keunini mi jim teköba likeŋŋi meleŋni qaknine öŋgömapkö mamböriŋa jönömninan undui keŋgötnini möta malbin. Anutugö könöŋŋan tuarenjoŋ-urupŋi eŋgohomawi, miangö kukŋi miyök asuhumapköra mönö mamböta malbin.

²⁸ *Kunŋan Mosesgö Köna keu andö qezawi, i mönö keu jakeŋe algetka yahöt karöbutŋan keuŋi naŋgöba jigetka keuŋambuk akŋa ewö, i mönö kude ak kömum waŋgigetka kömupkö buŋaya akŋa.

²⁹ *Mewö akŋapmö, ambazip kun kewöŋaŋgö keuŋaŋgöra mönö denöwö mötmörize? Kunöŋ Anutu Nahönŋaŋgö keuŋi könaŋan tökötahöba gilakza. Jöhöjöhö areŋ dölökŋaŋgö sepŋan lök tök kutum waŋgii sarakŋi ahökmö, sep mi yuai omaŋi ewö memba et alakza aka kalem möriam Toŋi Uŋa Töröŋi mi ilita mepaqepaik ak waŋgimakza. Kunŋan mewö aiga Anutunöŋ keuŋi kewöta

* **10:27:** Ais 26.11 * **10:28:** Dut 17.6; 19.15 * **10:29:** Eks 24.8

likepni dawikö dop wangii dop kölbawak? Köna keu qetala kömupkö bujaya akingö dop akzinmö, Anutunöŋ ambazip mewöŋangö likepni mi mönö könöpuk ak wangii qakŋe öngöi sihimbölö önöŋi qahö möta malma. Wani sihimbölönöŋ mönö dop köl wangibawak? Yangö könaŋangöra mönö denöwö mötmörize?

³⁰ *Keu kun kewö ahöza, “Jinöŋ jibi, nuŋgunöŋ guhubi, aknöŋ aki mi nöŋgö nuwa. Nöŋön mönö ambazip keuŋinaŋgö likepni melenmam.” Toroqeba keu kun kewö jii ahöza, “Kembunöŋ könagesöurupni engö keuŋini kewöta jim teköma.” Kun daŋön mewö jiyöhi, neŋön i möt wangizin.

³¹ Anutu malmal Toŋangö jeŋe kinda et neŋgui böröŋan neŋgumawi, miaŋön mönö kanjamŋambuk kötokŋi akŋa. Mewö.

³² Löwöribepüköra kewö jizal: Anutugö asakŋan kaiga buŋa qem aŋguba asarigeri, mönö nalö mutukŋi mi mötmöriba malme. Nalö miaŋgöreŋ mötnaripkö bim qeba sihimbölö gwötpuk miwikŋaiba mi töndup aum-möriba aongit aka kin köhöiget. Mi mönö kude ölum enguma.

³³ Nalö tosatŋe gamu qem engiget köŋjiliŋ mötketka qenjaröknöŋ engehiba malget. Nalö tosatŋe alaurupŋini tandök mewöyök ak engigetka yengö qöhöröŋine kinget.

³⁴ Tosatŋi kösö mire alget tatkeri, mönö i engeka sihimbölönöŋini mohotŋe möta malget. Sukinapŋini kiom qeba megeri, mi mönö sösoŋgai qakŋe möt aŋgön köla malget. Suepkö ainemaluku qainŋi kun qahö ayapkömawi, mi ahöm engizawaŋgö möta miaŋgöra urukölalep möta malget.

* **10:30:** Dut 32.35, 36

³⁵ Miangöra awösamkakakñini mönö nalö kewöñe kude gila mosötme. Mi kude mosötketka Anutunöñ mönö miangö töwañi ketañi engima.

³⁶ Anutunöñ yuai engimapkö keu jöhöi ahözawi, eñön mi buña qem angumegöra kinje. Miangöra Anutugö jitsihitñi wuatangöba lömböt möta mökösoñda kapan köla malme ewö, Suepkö buñañi miangön mönö engö buña akña.

³⁷ *Kewögöra mönö kin köhöiba malme: Nalö töröptökñi miyök mönö toroqeba mamböringa “Kunbuk kamawañön mönö kam kuñguma. Nalöñi qahö qem körii öngömapmö, nalöñañgö dop törörök kama.

³⁸ Törörök kamapmö, nöngö alanan ahakmeme diñdiñi wuatangömazawi, yañgö mötnaripñan mönö nam köl wangii mal köhöim öngöma. Kunbuk elenda mötnaripñi mosötma ewö, mi qahö dop köli urunan mönö yañgöra qahö söñgaima.”

³⁹ Keu mewö ahözapmö, neñön ambazip uruñini kunbuk elenda mötnaripñini mosöta könöp siagö buñaya akñei, mönö yengö kambunöñ qahö kinjin. Mewö qahöpmö, mötnaripñini mi mönö galöm kölinga Anutunöñ amöt qem neñgii mala Suep mire öngöbinañgö dop akzin. Mewö.

11

Ambazip mötnaripköra aka yuai kewö asuhuyök:

¹ Mötnaripkö könañi kewö: Yuaigö jörömçöröm akzini, mi asuhumapköra mönö köhöiba uruyahötñi qahö möt narizin. Yuai qahö ehekñi

* **10:37:** Hab 2.3-4

mianğö dop aka memba ölni ekingö mamböta awösamkakak kinjin.

² Möpñanğö möpñeyök könahiba ambazip mötnaripñinan nam köl enğiiga uruñini melenğetka Anutunöñ enğehi dop kölīga jim ölöwak enğiiga malget.

³ *Mötnaripñinan nam köl nenğiiga yuai pampakö könañi kewö möt asarimakzin: Anutunöñ keuñi jim kutuba mianğön Suep gölmegö öröyuaiñi pampak miwikñaiyök. Mianğöra nalö kewöñe yuai ehakzini, mi yuai ehekñi mianğöreñök qahö letota asuhuyök.

Abel, Enok, Noa yengö mötnaripñini

⁴ *Kein (Kain) Abel yetkөн Anutugöra jöwöwöl ohoyohotka Abelnöñ uruñi melenğiga mötnaripñan nam köl wañgii törörök tem kölīga köwakñan diñdini öngöyök. Mewö öngöiga Anutunöñ jöwöwölñi ehi dop köli jim ölöwahök. Jim ölöwaka Abelnöñ solanñi ahöhi, Anutunöñ keuñi mi nañğöba jüiga mötnaripñan nam köl wañgii mörök. Mewö möta mala kömuyökmö, mi tøndup nalö kewöñe ahakmemeñi möringa keu mianğön mönö toroqeba urunini kuñguba nañğöm nenğimakza.

⁵ *Azi qetñi Enok yañön mönöwök uruñi melenğiga Anutunöñ keuñi nañğöba jim ölöwahiga möta yañö jeñe dop köla malök. Mewö mala mali mötnaripñan Anutu nam köl wañgiiga wañgiri jebuk öngöyök. “Anutunöñ wañgiri öngöiga toroqeba miwik-ñaibingö osiget.” Buña Kimbi

* 11:3: Jen 1.1; Sum 33.6, 9; Jon 1.3 * 11:4: Jen 4.3-10 * 11:5: Jen 5.21-24

mianğö dop Enok mötnaripñan aňgön köl waňgiiga qahö kömuyök.

⁶ Uruñi Anutugöreñ melenjawañön mönö keu kewö möt narima: Anutunöñ malja aka Anutunöñ ambazip yaňgö jeñe dop kölbingö jaruzei, mi töwa qem eňgima. Keu yahöt mi möt nariba ölop Anutugö kösutñe kamapmö, qahö möt narim waňgiba öne yaňgö jeñe dop kölbingöra mönö osibin.

⁷ *Anutunöñ Noagöra yuai asuhumapkö galöm meme keuñi indelök. Indeli Noanöñ möt asariba sömbuñi qainñi kun möta ölni qahö ehiga mötnaripñan nam köl waňgiiga tem köla wañge meyök. Anutunöñ nanñi aka saiwaurupñi aňgön köl eňgimapköra möta wañge mi meyök. Noa mötnaripñan nam köl waňgiiga wañge meyöhi, ahakmeme mianön mönö gölme ambazip könañamñini goňgoñi indeli Anutunöñ keuñini jim teköiga ayuhuget. Uruñini qahö melenja ayuhugetmö, Noagö mötnaripñan nam köl waňgiiga Anutugö jeñe solanñi akingö kalemñi mi buña qem aňguyök. Ambazip Anutu möt narim waňgiinga keunini jim teköi solanimakzini, Noanöñ mönö mianğö dop solanñi ahök. Mewö.

Abraham Sara yetkö mötnaripñiri

⁸ *Anutunöñ Abraham gölme yaňgö buña akñapkö jiyöhi, mönö mianğöreñ anmapkö oholök. Oholi mötnaripñan nam köl waňgiiga keu mi tem kölök. Denikeaňgöreñ anda aňgotpawak mi qahö mörökmö, mi töndup nanñi gölmeñi mosöta anök.

* **11:7:** Jen 6.13-22 * **11:8:** Jen 12.1-5

9 *Anda Anutunöŋ gölme yaŋgö buŋa akŋapkö jim jöhöi ahöyöhi, mönö miangöreŋ aŋgorök. Aŋgota kian aka ambazip ahakmemeŋini qahö mörökmö, mötnariŋŋan nam köl waŋgiyö-ŋaŋgöra mönö töndup opo koumŋi kuŋguba ali miangöreŋ ahöba malget. Isimoröŋi Aisak Jeikob yetköŋ mewöyök Anutunöŋ gölme eŋgimapkö jöhöjöhö keuŋi miyök buŋa qem aŋguba gölme miangöreŋ toroqeba opo koumŋini kuŋguba ala ahöba malget.

10 Suep siti tandöŋŋan qahö gisahömawi, Abrahamnöŋ mi ekŋangö mamböta malök. Anutunöŋ siti miangö areŋi ala imutŋi memba miri tandöŋini esiba meiga pöwöwöm köhöikŋi ahöm öŋgömawi, mönö miangöreŋ aŋgotmangö al mamböta opo koumŋi malök.

11 *Mewö mala lök azi namŋi aiga mötnariŋŋan nam köl waŋgiiga köhöiba iwi ahök. Abrahamgö anömŋi Sara yaŋön köpin malökmö, mi töndup gölöm ala morö meyök. Anutunöŋ Abrahamgö könagesöŋi ketanŋi akŋapkö keu jöhöm waŋgiyöhi, yaŋgöra aka keuŋan öŋŋambuk akŋapkö möt nariba malök. Mötnariŋŋi miangön mönö nam köl waŋgiiga nahönŋa asuhui ehök.

12 *Azi mohot miangö mötnariŋŋan nam köl waŋgiiga lök kömukömugö dop ahökmö, mi töndup yaŋgöreŋök könagesö keta bölöŋi asuhuget. Senŋelau suepnöŋ asarigetka jaŋgöŋini oyoŋbingö osizini, me sak köwet jitŋe ahözei, gwölönarökurupŋan mönö miangö dop sehiba asuhuget.

* 11:9: Jen 35.27 * 11:11: Jen 18.11-14; 21.2 * 11:12: Jen 15.5; 22.17; 32.12

Ambazip kewöñan Suep mirigöra awöweñgöba malget:

13 *Ambazip kösohotñini lök jizini, mi körek uruñini melenđa Anutu möt narim wañgiba mala kömuget. Anutunöñ gölme engimapkö keu jöhöm engii malgetmö, gölme miangörej qahö angotket. Mewö qahöpmö, gölmeñini mi köröwen kinda uba eka waikñi memba söñgaiget. Eka öne söñgaiba kewö jim miwikñaiba jiget, “Gölmeñöñ mönö kiana aka qandak maljin.”

14 Ambazip nanñine miri gölmeñine angotpingö jaram timakzei, yeñön mönö keu mewö jimakze.

15 Gölme mosötkeri, miangö mötmöriba keuñi jibeak ewö, yeñön mönö ölop lilingöba miangörej angetka uruñinan teköbawak.

16 Mönö ölop lilingöbeakmö, yeñön miangöra qahö mötmöriba malget. Miangöra qahöpmö, kantri qainñi kun Suepnöñ ahözawi, mönö miangörej angotpingö awöweñgöba malget. Anutunöñ yeñgöra siti kun meiga ahözawi, miangöra qetñi “Nanine Anutu!” qetketka mi möta söñgaiba yeñgöra aka gamu kun qahö mörakza.

Abraham, Aisak, Jeikob, Josef yeñgö mötnariñini

17 *Anutunöñ Abraham esapesapñöñ al wañgiiga mötnariñan nam köl wañgiiga Aisak Anutu kalema wañgiyök. Anutunöñ Aisaköra gölme wañgimangö jiiga Abrahamnöñ jöhöjöhö keu mi buña qem anguyökmö, töndup nahöññi mohok-kun mi mosöta mianñön jöwöwöl ohomangö ahök.

* 11:13: Jen 23.4; 1 Hist 29.15; Sum 39.12 * 11:17: Jen 22.1-14

18 *Anutunöŋ Abrahamgöra keu kewö jii mörök, “Aisaknöŋ mönö gwölönarökurupki nam köl enŋiiga asuhuba göhö qetki bisiba malme.” Keu mi mörökmö, töndup nahönŋi altanöŋ ala mosörök.

19 Mosöta kewö kewöta mötmöriyök, “Kömumapmö, Anutunöŋ ölop köhöiba mem gulii kömupnöhök wahötma.” Söpsöp keu mewö jiyöhi, miangö dop nahönŋan dumŋe kunbuk kömupnöhök ewö wahöri waŋgirök.

20 *Mötnariŋŋan Aisak nam köl waŋgiiga nahönyahötŋi Jeikob aka Iso (Esau) mi kötuetsköm etkiyök. Anutugö kötumötuetti miangön mönö nalö könangepŋe mewöyök dop köl etkii qakŋire öŋgömakŋapköra köuluköyök.

21 *Jeikobnöŋ kömumangö ahöhi, nalö miangöreŋ mötnariŋŋan nam köl waŋgiiga nahönŋi Josefgö nahönyahötŋi yahöt mi kötuetsköm etkiba öröŋangö kitipŋe nariba Anutu waikŋi memba möpöseiyök.

22 *Josefgö kömupŋan dopdowiyöhi, nalö miangöreŋ möt-nariŋŋan nam köl waŋgiiga Israel könagesö Ijpt mosöta kageri, miangö kösohotŋi mi jim guliba jiyök. Mewö jiba könangep qamötŋi denike löm kölmegö keuŋi mi jim kutum enŋiyök. Mewö.

Mosesgö mötnariŋŋi

23 *Mötnariŋŋiran Mosesgö iwinamŋi nam köl etkiiga Mosesnöŋ asuhuyöhi, i nalö miangöreŋök könahiba köiŋ karöbutkö dop asambörohot. Morö

* 11:18: Jen 21.12 * 11:20: Jen 27.27-29, 39-40 * 11:21: Jen 47.31-48.20 * 11:22: Jen 50.24-25; Eks 13.19 * 11:23: Eks 2.2; 1.22

mi eksihimnambuk tandökni kun ahöhi, mi eka kin kembugö jimkutukutuñi ongitpitpuköra kenğötñiri qahö möta moröñiri asamböta galöm kölohot.

24 * Mosesnön qariiga qetñi farao kin börtanğö nahönñi qetketka mötnaripñan nam köl wañgiiga qet mi bisimamğö tököba farao kinğö mirinñi mosöta angaiyök.

25 Ölop toroqeba Ijpt yembuk singisöndökö sösongainñi miwikñaiba mi nalö töröñi lañ söngaibawakmö, malmalñi mi andö qeyök. Mi andö qeba Anutugö urumelen könagesö yembuk toroqei kahasililin ak enğigetka mi mohotñe möta aum-möriringö möri öngöngöñi ahök.

26 Anutunön töwa wañgimapkören göröken uba kin köhöiyök. Mianğöra Ijpt yeñon guli dötnamñinambuk aka siyonşayonñi qahö malgeri, mianğö möri yuai eretñi ahök. Mianön yuai eretñi aiga andö qeba Amötqeqe Toñambuk toroqeiga yağöra aka mepaqepaik ak wañgiba malgetmö, mi möri töndup ölni aka öngöngöñi ahök.

27 Mötnaripñan Moses nam köl wañgiiga Ijpt kin kembuñinangö irimñi seholibapuköra kenğötñi qahö möta kantrinñi mosöta kayök. Anutu ehekñi qahö mi ehekö tandök mötmörim wañgiba malöhi, mianğöra mönö kapan köla kin köhöiyök.

28 * Mötnaripñan nam köl wañgiiga ak-kömükömu kendon* ala mianğö arenñi jim kutum enğiiga söngaiba tatket. Kömupkö garatanön Ijpt uruñe

* **11:24:** Eks 2.10-12 * **11:28:** Eks 12.21-30 * **11:28:** Anutugö garatanön İsrail ambazip enğehoriba enğonğiröhi, mianğö kendonñi mi nanine keunön ak-kömükömu kendon jinga Nei keunön Pasowa jize.

nahönñini mutukñi engugetka Israel yengö nahönurupñinan kömumbepuköra mönö jim kutum engiiga nangunine sep miriget.

29 *Mötnaripñinan Israel ambazip nam köl engiiga Köwet Pisikñi mi gölme örönñe anangö dop kutuba kaget. Ijpt yarö azi yenjön mi kutubingö esapkögetmö, mönö onöñ nemulahöba ayuhuget.

Rahab aka mötnaripkö ambazip ipñi tosatñi

30 *Mötnaripñinan Israel könagesö nam köl engiiga Jeriko taonöñ kaba kiripo selñi silim 7:gö dop liliköba mohotñe anda kagetka kiripo selñi selñi köhöikñan mönö gororongöba etket.

31 *Mötnaripñan köna ketanji ambi Rahab nam köl wangiiga kewö aiga Anutunöñ ehoriyök: Israel jitñememe yetkön gölme ek miwikñajabtköra ölöñ kayohotka ala aka köl öröm etkiyök. Anutunöñ mi eka könanğep yangiseñ ambazip engui ayuhugetka Rahab ehorii yembuk mohotñe qahö kömuyök. Mewö.

32 *Wani keuya kunbuk toroqeba jibilenjak? Gideon, Barak, Samson, Jefta, Deiwid, Samuel aka kezapqetok ambazip tosatñi yengö kösohotñini toroqeba jibilenjak ewö, nöngö nalönan mönö qahö dop kölbawak.

33 *Mötnaripñinan tosatñi nam köl engiiga jakömbuak tohoñi tohoñi tulumgöba memba ambazip mindingöm engigetka ahakmeme diñdiñi wuatangöba malget. Anutunöñ yuai nenğimapkö

* **11:29:** Eks 14.21-31 * **11:30:** Jos 6.12-21 * **11:31:** Jos 2.1-21; 6.22-25 * **11:32:** Kemb 6.11-8.32; 4.6-5.31; 13.2-16.31; 11.1-12.7; 1 Sml 16.1; 1 Kiñ 2.11; 1 Sml 1.1-25.1 * **11:33:** Dan 6.1-27

keu jöhöi ahözawi, gwötpukñan keu mianğö dop köuluköba möt narigetka ölni asuhui meget. Tosatñan laion sömbup sutñine köuluköba möt narigetka Anutunöñ laion numbuñini jöhöyök.

³⁴ *Tosatñan könöp bölam uruñe köuluköba möt narigetka Anutunöñ könöp ösumñi qömbököiga qahö engohoyök. Tosatñi bingö sou ketañi mianñon engubingö aketka Anutunöñ yengö souñini jitñi jöhöiga kök alget. Gwötpukñan lölöwöröñi aka köuluköba möt narigetka Anutunöñ ösum enğiiga köhöiget. Tosatñan bim qeba köuluköba möt narigetka Anutunöñ kuk enğiiga suahö köhöikñi aket. Kian yengö yarö kambuñinan kagetka tosatñan köuluköba möt nariba mewö mönö enğuatañgögetka unjurata anget.

³⁵ *Ambi tosatñan kitipñinan kömui köuluköba möt narigetka Anutunöñ mem gulim wanğii kömupnöhök wahöriğa kunbuk toroqeba aitonğöget. Ambazip tosatñan kömup andöñe oyaenkyoaeñ öngöñgöñi miwikñaibingöra möta kapan köla kinget. Mewö kingetka ihileknöñ enguba kahasililin könañi könañi ak engiba kewö jii mötket, “Anutu qañ kölnönga zilañ pösat gihibin.” Mewö jii mötketmö, yeñon mi tökögetka toroqeba janğauranğa mem engiba malget.

³⁶ *Tosatñan Anutu möt narigetka mepaqepaik aka ihilek wahiñambuknöñ enğugetka sihimbölö könañi könañi miwikñaiba malget. Toroqeba tosatñi gwaröhöba kösö miriñi miriñi mianğöreñ al engiget malget.

* **11:34:** Dan 3.1-30 * **11:35:** 1 Kin 17.17-24; 2 Kin 4.25-37

* **11:36:** 1 Kin 22.26-27; 2 Hist 18.25-26; Jer 20.2; 37.15; 38.6

37 *Tosatņi kötnöņ engugetka kömuget. Tosatņi segenöņ mitim engigetka yahöt aket. Tosatņi bingö sou ketañi mianjön engugetka kömuget. Tosatņan lama silenji aka meme (noniņ) silenji mianjön opo ewö löngöta laņ anda liliköget. Mewö wanapņi töhön aketka sesewerowero aka kahasililiņ laņ mem engigetka malget.

38 Suepkö aködamunņinambuk aka gölmeğö ahak-meme bölöñaņ-göra mötketka qahö dop köl enģiiga mianģöreņ qahö toroqeget. Qahö toroqeba laņ liliköba gölme qararaņkölkölņe anda kaba kundunji kundunji öngöba eta baņet me gölme titiņgit uruņe ahöba malget. Mewö.

39 Ambazip kösohotņini jizali, körek mi mötnariņņinan nam köl enģiiga uruņini melenģetka Anutunöņ enģehi dop kölīga jim ölöwak enģiiga malget. Mewö malgetmö, mi töndup Anutunöņ oyaenģoyaenģ qainņi kun neņģimapkö keu jöhöi ahözawi, mianģöreņ yeņģöreņök kunöņ kun mönö qahö aņgorök. Qahö!

40 Anutunöņ i nanņinök qahöpmö, mönö nembuk mohotņe aködamuninambuk ak teköbingöra mötza. Mewö möta mianģöra oyaenģoyaenģ qainņi kun neņģii miwikņaibingö keu areņi ali ahöza. Mewö.

12

Anutunöņ iwi aka mindiņgöm neņģimakza.

1 Ambazip kambu keta bölökņi mewöņan mötnariņpkö könañi naņģöba jiba kousu ewö liliköm neņģiba kinjei, mi mötzin. Mianģöra

* 11:37: 2 Hist 24.21

neñön mewöñanök mönö lömbötnini pakpak aka siñgisöndok awamñanök köpeim neñgimakzawi, mi gilin anma. Anutunöñ nini mötnaripkö bimñi qeba Satan luhut al wañgibingö arenji ali ahöza. Mianğöra malmal sutñi ki malagun kömumbini, sutñi mi mönö aonğit tandök kapan köla bim qeba ösumninan anbin.

² Jisösnöñ mötnaripnini mem letori ahui mem qarri köhöiba aködamunñambuk ahakzawi, Toñi mi mönö jeninan uba törörök ehakin. Yañön ölop toroqeba Suep mire mala söñgaibawakmö, mi mosöta eta mianğö salupñe sihimbölo mörök. Maripomnöñ kegwek-kahasililiñ ewö kömumamğö gamu möta qahö tököyökmö, mi qenjaröknöñ möta mökösoñda kömuyök. Kömumba Anutugö jakömbuak dum tatatnöñ öngöba böröñi ölñe tatza.

³ Siñgisöndok ambazip yeñön mewö tuarenjoñ ak wañgigetka sihimbölo möröhi, eñön mönö i mötmöriba malme. Sörauba löwöriba urueret aka kinda mötnaripñini aka jörömqörömqini mosötpepuköra mönö mewö ahakñe.

⁴ Siñgisöndok akinbuköra aum-möriba bim qeba malgetka mianğöreñ siñgisöndökö Toñan mönö sepgwörörök (gulibambam) qahö enguyök.

⁵ *Iwinöñ nahönböraturupñi yeñğöra qamban keu engizawi, Anutunöñ mianğö dop keu kun engöra kewö jiiga mönö mi ölum engui malje, “O nahöni, Kembunöñ mindiñğöm gihimakzawi, mianğöra mönö mötnöñga silebile kude akña. Keu jim gihiiga mianğöreñ mönö urueret kude aka malman.

* 12:5: Job 5.17; Qam 3.11-12

6 Kembunöŋ ambazip jöpaköm enġimakzawi, ia mindiŋgöm enġimakza. Ambazip morö ewö enġömemba köyan köl enġimakzawi, mi körek kömbinöŋ enġumakza.”

7 Morö kun iwiŋan qahö mindiŋgöi laŋ malbawak, mewö mönö yaŋgö moröŋi qahö akawak. Mianġöra Anutunöŋ iŋini nahön-böratŋi ewö tandök ak enġimakza. Mianġöra lömböt enġii mi mönö mindiŋgöm enġimapkö tandök mötmöriba möta mökösoŋda diŋgiba malme.

8 Anutunöŋ nahönböratuŋi pakpak mindiŋgöm enġimakzawaŋgö dop iŋini qahö mindiŋgöm enġibawak ewö, mönö yaŋgö nahönböratuŋi ölni qahö akeak. Mewö mönö iwi qahö wilin morö (bastet) akeak.

9 Keu mi kunbuk kewö jimam: Gölmegö iwininan mindiŋgöm neŋgiġetka yeŋgöra göda qem enġiba malin. Silegö iwininan korembiŋi akzemö, uruninaŋgö Iwininan mönö ölni aka öŋgöŋgöŋi akza. Mianġöra mönö yaŋgö keu bapŋe anda diŋgiba mal köhöninga dop kölma.

10 Silegö iwininan mönö nannini mötmötŋinaŋgö dop kapaŋ köla gölmenöŋ nalö töröpŋi malbingöra aka mindiŋgöm neŋgiba malakze. Yeŋön mewö malakzemö, Anutunöŋ mönö tök kutum neŋgii yaŋgö dop sarakŋi akingöra aka mindiŋgöm neŋgimakza. Mewö aka ölna ölöwaka oyaenköyaen akingöra mötza.

11 Kunöŋ mindiŋgöm neŋgiġa nalö mianġöreŋök mönö sösoŋgai tandök qahö ahakzinmö, wösöbirik sihimböloŋambuk mörakzin. Keu mi ölnapmö, mianġö ölnan mönö könaŋgep kewö asuhuma: Anutunöŋ ambazip mewö mianön köl gulim

enjimakzawi, yengö ahakmemenjanan dinjiiga luai qem engii möta malme. Mewö.

Qambaŋ aka galöm meme keu tosatŋi

¹² *Miaŋgöra “awötŋini teköi böröŋini lömböriba sörörauba kinjawi, mi mönö memba wahöta mindiŋgöme. Tambuŋini jula siminŋini suljawi, mi mönö mem köhöime.” Buŋa keu kun mewö ahöza.

¹³ *Kekporörökŋambuknön (kerekporikŋambuknön) töwölatiba eta qeiga könaŋan sula bölim teköbapuk. Keu miaŋgö dop alaŋini aŋgösirip kude ak waŋgimemö, mönö ölöwakŋapköra kapaŋ köla malme. Buŋa keu kun kewö ahöza, “Köna tiba anangö könaŋini mönö mem qölöleigetka diŋdiŋi akŋe.”

Keu miaŋgö dop mönö uru ölöwak qem aŋguba malme.

¹⁴ Ambazip körek yembuk luainön urumohot malmegöra mönö köhöiba kapaŋ köla malme. Kunŋan malmal sarakŋi qahö miwikŋaimawi, mönö öne Kemu qahö ekŋa. Miaŋgöra Anutunön mem sarahim enjimapköra mönö kapaŋ köla kinme.

¹⁵ *Kunön Anutugö kalem möriamŋi oŋgita qahö buŋa qem aŋgubapüköra mönö galöm mem aŋguba malme. Nene nupnön siriuret kömbukŋambuk mi jalöŋinambuk qözölmakzin. Miaŋgö dop uru mötökömbukö könaŋi pakpak mi qeapköme. Qahö qeapkögetka miaŋön qariba kota enjololon mem engii gwötpuk engö uruŋinan tölöhobapuk.

* **12:12:** Ais 35.3 * **12:13:** Qam 4.26 * **12:15:** Dut 29.18

16 *Mewöyök kunöŋ kaisero akapuk me Iso (Esau) ewö aŋgöjörakŋambuk malbapuköra mönö galöm mem aŋguba malme. Isonöŋ morönahön mutukŋi ahöhaŋgö börösamot toŋi ahökmö, keu mi nene indim mohot nemapköra aka qeapköyök. Qeapköiga munŋi Jeikobnöŋ börösamotkö keunŋi mi nene mianŋön bohonŋi memba buŋa qem aŋguyök.

17 *Könaŋgep jöhöjöhö keunŋiraŋgö dop asuhui Iwiŋaŋgö kötümötuetŋan mönö Jeikob qakŋe öŋgöyök, mi mötze. Mewö öŋgöi Isonöŋ kötümötuet mi buŋa qem aŋgumamgö möta uleta sahöri imbilŋan erök. Mewö kapaŋ köla ulerökmö, töndup keu munŋambuk jöhöyohori, mi utekömamgö köna kun qahö miwikŋaiyök. Mianŋöra morö mutukŋaŋgö kötümötuetŋi mi buŋa qem aŋgumamgö mörökmö, mianŋöreŋ qaköba osiyök.

18 *Mönöwök Israel könagesö yeŋön Sainai (Sinai) kösutŋe kaba kingetka kundunŋi mianŋön könöp bölamnöŋ jeyök. Jeba köwak-köwak eta panaman meiga raidimbom qeiga Anutunöŋ mianŋöreŋ yembuk jöhöjöhö areŋ ahök. Sainai (Sinai) kundunŋi mianŋön börönöŋ oseibinaŋgö dop akzapmö, eŋön kundunŋi mewö mianŋö kösutŋe qahö kaba malje.

19 Anutunöŋ jöhöjöhö areŋi mi Sainai kundunŋe kewö ahök: Garataurupŋan tömun qainŋi kun ugetka aŋgötömualŋi azöŋda kaiga keu köhöikŋi jiyöhaŋgö kourukŋi mötket. Mi möta keu mewöŋi kunbuk kude jii mötmegöra uletket. Eŋön kundunŋi

* **12:16:** Jen 25.29-34 * **12:17:** Jen 27.30-40 * **12:18:** Eks 19.16-22; 20.18-21; Dut 4.11-12; 5.22-27

mewö mianğö kösutnje qahö kaba malje.

20 *Anutunöŋ keu köhöikŋi jiba kewö jim kutum enğiyök, “Kunŋan kun ambazip me bau sömbup kunöŋ kundunŋi mi oseima ewö, i mönö kötnöŋ qegetka kömuma.” Mewö jim kutum enğiiga keu mi wuatangöbingö möt lömböriba osiget. Mianğöra keu kunbuk kude jimapköra uletket.

21 *Yuai kanjamŋambuk kötökŋi mi uba eketka Mosesnöŋ kewö jiyök, “Ni mönö keŋğötni möta jönömnŋi undui kinjal.”

22 Enjön mewö qahöpmö, mönö uruŋini melenđa Zaion kundunŋi dopdowiba kaŋgota malje. Anutu malmal Toŋangö sitiŋi qetŋi Jerusalem Suepnöŋ ahözawi, mianğoreŋ garataurupŋi ten tausenni ten tausenni yeŋön kambuŋi kambuŋi köla unduba sösongai ahakzei, enjön mönö siti mi dopdowiba malje.

23 Mutuk ahuahu dölökŋi ahuba urumelen könagesö aketka qetŋini malmalgö buknöŋ ohogetka Suepnöŋ ahözawi, enjön mönö yeŋö kambuŋini toroqeba malje. Anutunöŋ ambazip körek neŋğö keunini kewöta jim tekömakzawi, enjön mönö bemnini yambuk toroqeba malje. Anutunöŋ ambazip solanŋi mem letot enğiiga aködamunŋinambuk aka kömugeri, enjön mönö yeŋö uŋaŋinambuk toroqeba malje.

24 *Enjön jöhöjöhö areŋ dölökŋangö galömŋi Jisös yaŋğoreŋ kaba yambuk qekötahöba kinje. Yaŋön sepŋan qewösahöi enğömirimakzawi, mönö malmal mewöŋe kaŋgota malje. Abelnöŋ sepŋi

* 12:20: Eks 19.12-13 * 12:21: Dut 9.19 * 12:24: Jen 4.10

mokoyökmö, Jisösgö sepñan Abelgö sepñi ongita keu aködamunñambukö munñgemñi akza.

²⁵ *Mutuk azi kunöñ gölmenöñ mala Anutugö keu jitsihitñi ambazip indel enñgiiga gwötpukñan mi mötpingö tökögetka Anutunöñ likepñi melenñi qakñine öngöyök. Yeñön mianğoreñök kök albingö osiget ewö, neñön mönö denöwö kök albinak? Nalö kewöñe alanini kunöñ Anutugö keu jitsihitñi Suepnöhök indela jimakzawi, nini i nönöñgan aka mosötzin ewö, mönö lömbötnöhök kök qahöpmahöp albin. Qeçetalninañgö likepñi mönö ölña qakñine öngömapkö mötzin. Mianğöra kunñan sañep qei mötzei, eñön keu mi mötpingö kezapolök kude akñe. Kezapolök malbepüköra mönö galöm mem añguba malme.

²⁶ *Mönöwök keuñi jiiga mötketka gölme utuköba memenjaliyökmö, kezapçetok keuñi kun jiba jöhöiga nalö kewöñe kewö ahöza, “Nalö kungen dumñe kunbuk gölme utuköba memenjalinam. Gölmeyök qahöpmö, yuai akiga suepnöñ mewöyök utuköma.”

²⁷ Keu mewö ahözapmö, “Nalö kungen mönö dumñe kunbuk” jizawi, keu mianğö könañi kewö: Anutunöñ öröyuai miwikñaiiga ahözawi, mianjönök mönö utuköba utekömapmö, Suep mirigö öröyuai qahö utukömawi, mianjön mönö kin köhöiba ahöm öngöma.

²⁸ Neñön bemtohoñ qahö utukömawi, mia buña qem añguba kinjin. Mianğöra mönö “Anutu saiwap!” jiba mewö mianjön waikñi memba möpöseiba uru ölöwak mem wañjimakin. Mi jitñi

* 12:25: Eks 20.22 * 12:26: Hag 2.6

onçitpinbuköra kençötnini möta aka gödañi qeba malbin.

²⁹ *Neñgö Anutuninan mönö könöp bölam ewö akza. Miançöra neñgohoi sihimbölä mötpinbuköra mönö kençöt mötmöt qakçe göda çem wañçimakin. Mewö.

13

Qambañ keu teteköñi

¹ Urumelenç alaurup nançini mönö jöpaköm añçuba malme.

² *Kian ambazip sutñine kamei, mi mönö köyan köl eñçigetka köisirik miwikñaimakçe. Mewö ak- ingö mönö kude ölum eñçumakça. Tosatñan mewö akeri, miançön Suep garata tosatñi qahö möt asariba mohot köl öröm eñçigetka miriñine malçet.

³ Tosatñan kösö mire malçei, mi mötmörim eñçimакçe. Nançinak yembuk gwaröhöm eñçigetka malbeak tandök möta mönö i mötmörim eñçimакçe. Tosatñi ak bölim eñçigetka miançö sihimbölöñi mötzei, mi mönö nançinak mewö malbeak ewö möta mötmörim eñçimакçe.

⁴ Ambazip qesabulum aka serowilin akzei, Anutunöñ i jim teköm eñçima. Miançöra körek eñön mönö awanöm malmal göda qeçetka sarakñi aiga awanöm sutñire töteçqötek töwötñi kun qahö ahöma.

⁵ *Anutunöñ nançak keu kun kewö jii ahöza, “Nöñön mönö nalö kunöñ qahö gömosöta andö guhumam.” Keu miançöra aka ahakmemenjanan membagan membingö nepaçepalok kude

* 12:29: Dut 4.24

* 13:2: Jen 18.1-8; 19.1-3

* 13:5: Dut 31.6,

8; Jos 1.5

köpösöngömakñemö, yuai ahöm engizawi, mianğöra mönö mötket dop köl enjiiga söşöngäubuk malme.

⁶ *Mewö möta ölop ewebibininambuk saitıñgit kinda kewö jiba malbin, “Kembunöñ baukbaukni aiga gölme ambazipnöñ ayuhum niñgimeañgö dop qahö akze. Mianğöra keñgötni kun qahö möta maljal.”

⁷ Galömurupñinan Anutugö keu jiget mötkeri, i mönö mötmörim engiba malme. Ahakmemeñini denöwö aka megetka malmalñinan teköyöhi, mönö mi mötmöriba mötnaripñinanğö silikñini wuatañgöba malme.

⁸ Jisös Kraist utekutekñi qahö. Mutuk malöhi, miyök merak malja aka nalö teteköñi qahö mal öñgöma.

⁹ Kalem möriam toroqeba buña qem anginga urunini mem köhöiiga ölöwahakñapmö, nene nemingö silikñi mi me mi mianön mönö urunini mem köhöimapkö osimakza. Tosatñan nenegö dönqizizin könañi könañi wuatañgögetka ahakmeme mianön mönö qahöpmahöp bauköm enjiiga pöröpköyök. Mianğöra tosatñan dönqizizin murutñi murutñi ambazip kusum engimakzei, eñön mönö keu mi mosötme. (Silikö keunöñ mönö janjuñ kude ak engima.)

¹⁰ Jöwöwöl ohoho alta qainñi kun mi nengören ahöza. Gölmenöñ opo seri jikegö nup memakzei, yeñön jöwöwöl qainñi kun mianğö bahöñi memba nemingö osimakze. Anutunöñ yeñğöra keu mewö qahö jim teköi ahöza.

* 13:6: Sum 118.6

11 *Gölmegö jike nup galöm bohonñan kinda ambazip sinjisöndokñini köl könjöratmapköra aka sömbup qeba sepñi memba jike olenji töröñji kötökñi mianğoreñ öngömakzapmö, sömbup öñini mi memba miri qandak maljei, mianğö sel yaigepñe anda mianğoreñ ohogetka jeba ayapkömakze.

12 Mianğö dop Jisös mewöyök könagesöurupñi nanñi sepñan mem sarahim engimapköra aka siti selgö nanñu yaigepñe qegetka sihimbölö möta kömuyök.

13 Mianğöra miri qandak* maljini, neñön mönö mianğö sel yaigepñe anda Jisösgöreñ toroqebin. Yangöra aka mepaqepaik ak neñgim�akzei, mönö mi bisiba malbin.

14 Mi kewögöra: Siti teteköñi qahö ahöm öngömawi, mi gölmenöñ qahö ahöm neñgizapmö, siti könanğep asuhum neñgimawi, mi ekingö mönö jaram tiba maljin.

15 Mianğöra mönö qösösök Jisösnöñ nam köl neñgiiga Anutugöra möpömpösei naluk ala malbin. Jisös qetñi möpöseimakzei, yeñgö numbu jitñinanğö öñan mönö Anutugö nalukñi akza.

16 Yuai ahöm engizawi, mi mendenğ anğuba mem ölöwak anğumakzei, mianjön mönö Anutugö nalukñi kun akza. Anutunöñ naluk mi ehi uruñan ölöwahiga dop kölakza. Mianğöra mewö akñegöra mönö kude ölum engumakña.

17 Galömurupñini mönö tem köl engiba kukösumñini bapñe anda malme. Nup megeranğö kösohotñini Anutugö jeñe almei, yeñön mönö mianğö tandök engeka uruñini galöm kölakze.

* 13:11: Lew 16.27

* 13:13: Gölmenöñ kusus maljini, mianğö qetñi qandak.

Yeñön nupņini mi urulömböt qakņe membepuk. Mianjön injini qahö bauköm enġibawak. Mianğöra mönö keunjanğö bapņe anda malgetka sösöņgai qakņe nupņini megetka dop kölma.

¹⁸ Mönö neņğöra aka Anutu köulukömakņe. Yuai pakpak mianğoreņ ahakmeme qetbuņañambuk akingö sihimņi ahöm neņgiiga Anutunöņ neņgeka “Dop kölja,” jiiga urukezapninan möringa ölöwahakza. Keu mi möt yaközin.

¹⁹ Nöņğöra köulukömakņegöra mönö kapan kölā kewögöra kuņgum enġizal: Injini köulukögetka Anutunöņ nalö qahö mem köriiga ölöwaka ölöp kunbuk enğoreņ kamam.

Kewö köulukömakzin:

²⁰ Jisösnöņ kömuyöhaņğöra aka lama galöm qetbuņañambuk aka malja. Sepņi mokoba mianğö muņgem silimbanņan Anutugö jöhöjöhö areņi qekötahöba mem köhöiiga nalö teteköņi qahö ahöm öņgöma. Anutunöņ Kembunini mi mem guliiga kömupnöhök wahöta köhöiba malja.

²¹ Anutu luai Tonjan mönö inahöm enġiba jitsihitņangö dop aka memba malmegö aködamunņi pakpak enġimakņa. Mewö ölöp köhöiba nup ölöpņi könaņi könaņi memba malme. Yañön mönö möwölöhöba kuņgum enġiiga Jisös Kraistköreņ naņğöba malmal Anutugöreņ dop köljawī, mewö malme. Kraistkö qetbuņañi mönö nalö dop möpöseininga nalö teteköņi qahö aködamunņambuk ahöm öņgöma. Keu mi ölnja.

Keu teteköņi

²² O urumeleņ alaurupni, nöñön kewö qesim enġizal: Buņa Kimbi töröpņi kiyök ohom enġizal.

Miangöra andö qambaŋ keuni ki mönö kapaŋ köla buŋa qem aŋgume.

²³ Buzup ki mötme: Urumelen alanini Timoti i kösö mireyök pösatketka erök. Ösumok ki kaŋgotma ewö, mönö yambuk kaba eŋgekit.

²⁴ Yaizözkök keuni albiga galömurupŋini pak-pak aka Anutugö ambazip sarakŋi körek yeŋgöra jigetka mötme. Itali alaurupninan yaizözkökŋini algetka eŋgöreŋ kaza.

²⁵ Anutugö kalem möriamŋan mönö körek embuk ahöm öŋgöba ahöma.

Burum-Mindik Bible
The New Testament and portions of the Old Testament
in the Somba-Siawari language of Papua New Guinea,
also called the Burum Mindik language.
Sampela hap Buk Baibel long tokples Burum Mindik
long Niugini

Copyright © 1992, 2002 The Bible Society of Papua New Guinea

Language: Burum-Mindik or Somba-Siawari (Somba-Siawari or Burum-Mindik)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-22

PDF generated using Haiola and XeLaTeX on 18 Apr 2025 from source files dated 31 Aug 2023

c0871260-68cc-5a50-953f-52200e105d1e